

M121V: Kaiserchronik A (V) [Ausschnitt]

- 0,277 daz buoch tuot uns kunt .
0,278 er vaht mit im drîe stunte .
0,279 mit offēnem strîte .
0,280 si sluogen wunden wîte .
0,281 si macheten manigen blutigen rant .
0,282 di Swâben werten wole ire lant .
0,283 unz si Julius mit minnen .
0,284 erbat ze einem teidinge .
0,285 ire lant si dâ gâben .
0,286 in sîne genâde .
0,287 sîn gezelt hiez er slahen dô .
0,288 ûf ein berc der hiez Swêvô .
0,289 von dem berge Swêvô .
0,290 sint si alle geheizen Swâbe .
0,291 ein liut ze râte vollen guot .
0,292 si sint ouch redespæhe genuoc .
0,293 di sich des dicke vûre nâmen .
0,294 daz si guote recken wâren .
0,295 wole vertic . und wole wîchaft .
0,296 iedoch betwanc Julius Cêsar alle ire kraft .
0,297 die Swâbe rieten Juliô .
0,298 er kêrte ûf di Beiere .
0,299 dâ vile manic degen inne saz .
0,300 Boimunt ire herzoge was .
0,301 sîn bruoder hiez Incram .
0,302 vile schiere besanden si ire man .
0,303 in kom an der stunt .
0,304 vile manic helt junc .
0,305 mit halsberge und mit brünne .
0,306 si werten sich mit grimme .
0,307 si vâhten mit im ein volcwîc .
0,308 neweder êr noch sît .
0,309 gelac nie sô manic helt guot .
0,310 oder uns liegent diu heidenischen buoch .
0,311 diu sagent uns ze mære .
0,312 wie guote knehte Beier wâren .
0,313 dâ liset man inne “noricus ensis .”
0,314 daz quiut ein swert beierisch .

0,315 diu swert man dicke durch den helm sluoc .
0,316 dem liute was sîn ellen vile guot .
0,317 diu geslehte der Beiere .
0,318 her kômen von Armenie .
0,319 dâ Nôê ûz der arke gie .
0,320 und daz ölezwî von der tûben entvieng .
0,321 ire zeichen noch diu arka hât .
0,322 ûf den bergen di dâ heizent Ararât .
0,323 den sige den Juliûs an den Beieren gewan .
0,324 den muose er mit bluote sêre gelten .
0,325 der Sahsen grimmigez muot .
0,326 tet im dô leides genuoc .
0,327 di liset man . daz si wâren
0,328 des wunderlîchen Alexanders man .
0,329 der dâ ze Babilônîe ende genam .
0,330 dô teilte im sîn schatz vier sîne man .
0,331 di wolten wesen künînge .
0,332 di andern vuoren wîten irre after lande .
0,333 unz ir ein teil mit schifmenige .
0,334 kômen ûf bî der Elbe .
0,335 dâr dô der site was .
0,336 daz man diu micheln mezzern hiez sahs .
0,337 der di recken manigez truogen .
0,338 dâ mit si di Dürînge sluogen .
0,339 mit untriuwe kômen si in eine sprâchen .
0,340 di Sahsen den vride brâchen .
0,341 von den mezzern wessen .
0,342 sint si noch geheizen Sahsen .
0,343 Cêsar begunde dô nâhen .
0,344 zuo sînen alten mâgen .
0,345 ze Vranken den vile edelen .
0,346 ire biderben vordern
0,347 kômen . von Trôje der alten .
0,348 di di Kriechen zervalten .
0,349 ob ir iz gelouben wellent .
0,350 daz ich iu wile rehte zellen .
0,351 wie des herzogen Ulixes gesinde .
0,352 ein cyclops veraz in Sizilie .
0,353 daz Ulixes mit eineme spieze wole rach .
0,354 dâ er slâfente im sîn ougen ûz stach .
0,355 sîn geslehte dannoch .
0,356 was in dem walde alsô hôch .
0,357 sam di tanboume .
0,358 an dem hirne habeten si vorne ougen .
0,359 nû hât si got von uns vertriben hinnen .
0,360 in daz gewelde jenehalp Indiê .
0,361 troiani vuoren in dirre werlte .
0,362 vile wîten irre after lande .

0,363 unz Elenus ein verharteter man .
0,364 des küenen Hektoris witewen genam .
0,365 mit der er ze Kriechen .
0,366 besaz sîner vîande rîche .
0,367 Antenor vuor dannen .
0,368 dô Trôja was zergangen .
0,369 er stifte Mantowe .
0,370 und ein ander heizet Padowe .
0,371 Eneas erwaht roemischiu lant .
0,372 dâ er eine sû mit drîzic wîzen jungen vant .
0,373 Franko gesaz mit den sînen .
0,374 niden bî dem Rîne .
0,375 den Rîn hête er vûre daz mer .
0,376 dâ wuohsen alliu vrenkischen her .
0,377 di wurden Cêsari undertân .
0,378 iedoch was iz im harte sorcsam .
0,379 Julius worhte dô bî dem Rîne .
0,380 di sedelhove sîne .
0,381 Diuze ein stat guot .
0,382 Bobarte der ze huote .
0,383 Andernache ein stat guot .
0,384 Ingelheim der ze huote .
0,385 Megenze ein stat guot .
0,386 Oppenheim ir ze huote .
0,387 dô worhte der helt snel .
0,388 engegen Megenze ein kastel .
0,389 ein brügge worhte er dâ über den Rîn .
0,390 wie mahte diu burc baz gezieret sîn .
0,391 diu versanc sît in des Rînes grunde .
0,392 daz kom von den sünden .
0,393 daz Megenzære . nie neheinem ire hêren .
0,394 mit triuwen mite wâren .
0,395 dannoch stuont Trieren .
0,396 mit micheln êren .
0,397 si stuont an einem ende .
0,398 in Vranken lande .
0,399 in bellicus gallia .
0,400 vile küene wâren si dâ .
0,401 si werten wole ire lant .
0,402 unz Julius der wîgant .
0,403 mit listen in di burc an gewan .
0,404 daz machete der vürste Lâbiân .
0,405 nû wile ich iu sagen wie ez kom .
0,406 daz Julius Triere gewan .
0,407 si werten sich dâ vore daz ist wâr .
0,408 mêr denne vier jâr .
0,409 in der burc wâren dô zwêne .
0,410 gewaltige hêren .

0,411 der eine hiez Dulzmâr .
0,412 der ander Signâtôr .
0,413 di begunden sich zweien .
0,414 under in ze strîtenne .
0,415 umbe di grôzen hêrschaft .
0,416 diu ze Triere was in der stat .
0,417 Signâtôr wart Cêsaris man .
0,418 und sîn bruoder Lâbîân .
0,419 von ræten iz bekom .
0,420 daz Dulzmâr wart erslagen .
0,421 und daz Julius Triere überwant .
0,422 er vant dâr inne manigen tiurlîchen wîgant .
0,423 die wîle di hêrren .
0,424 mit triuwen samet wâren .
0,425 wie dicke si rieten
0,426 daz si wider den keiser riten .
0,427 mit grimmen volcwîge .
0,428 dô bestuont si der zwîvel .
0,429 vile michel volc ze schanden gât .
0,430 dâ si der zwîvel bestât .
0,431 di dâ wole sint einmuote .
0,432 di werdent dicke stæte .
0,433 durch zwîvel der hêrren .
0,434 sô nam in Julius alle ire êre .
0,435 also Julius in Trieren kom .
0,436 si wântten si hetten alle den ire lîp verloren .
0,437 Cêsar was edele . und küene .
0,438 diu burc dûhte in veste . und schoene .
0,439 von diu liez er di hêrren
0,440 in den selben êren .
0,441 dâ er si dâ vore inne vant .
0,442 di burc bevalch er in ir aller gewalt .
0,443 den oberesten hêrren .
0,444 den lêch er guote lêhen .
0,445 den kûenesten gap er daz golt .
0,446 di wâren im alle willic und holt .
0,447 di allerarmesten diet .
0,448 di liez er âne gebe niht .
0,449 daz lêrt in sîn diemuot .
0,450 Cêsar was milte und guot .
0,451 vile michel was sîn sin .
0,452 also lange wonete er under in .
0,453 unz im alle diutische hêrren .
0,454 willic wâren zuo sînen êren .
0,455 dô Julius wider ze Rôme begunde nâhen .
0,456 si ne wolten sîn niht entwâhen .
0,457 si sprâchen daz er durch sînen unmâzen zorn .
0,458 ire heres hête vile verloren .

0,459 und daz er ze diutischen landen .
0,460 âne ire urloup ze lange wære bestanten .
0,461 mit ungemuote er wider wankte .
0,462 ze diutischem lande .
0,463 er sande nâch allen den hêrren .
0,464 di in diutischem rîche wâren .
0,465 er klagete in allen sîne nôt .
0,466 er bôt in sîn golt rôt .
0,467 er sprach swaz er in ze leide hête getân .
0,468 er wolte si es wole ergetzen .
0,469 dô si vernâmen sînen willen .
0,470 dô besâmeten si sich mit grimme .
0,471 ûzer gallia und ûzer germania .
0,472 kômen schar manige .
0,473 mit schînenten helmen .
0,474 mit vesten halsbergen .
0,475 si leiteten manigen schoenen schildes rant .
0,476 als ein vluot vuoren si ze Rôme in daz lant .
0,477 dô iz Rômære gesâhen .
0,478 wie harte si erkômen .
0,479 dô ervorhte im vile manic man .
0,480 dô Julius mit diutischer ritterschefte sô hêrlîchen kom .
0,481 und si sâhen schînen .
0,482 di breiten schar sîne .
0,483 vane unde borten .
0,484 ire lebenes si harte vorhten .
0,485 Rigidus . Cato . und Pompeius
0,486 di rûmeten alle roemischen hûs .
0,487 und aller senatus .
0,488 mit sorgen vluchen si dâr ûz .
0,489 er vuor in nâch jagente .
0,490 vile wîten slahente .
0,491 Pompeius vlôch an daz mer .
0,492 er gewan daz aller kreftigez her .
0,493 daz in der werlte ie dechein man .
0,494 zuo sîner helfe gewan .
0,495 Julius strebete in allen engegene .
0,496 iedoch mit minnerere menige .
0,497 durch der Diutischen trôst .
0,498 wie vaste er in nâch zôch .
0,499 dâ wart daz harteste volcwîc .
0,500 als daz buoch vore quiut .
0,501 der in disem mergarten .
0,502 ie gevrûmet mahte werden .
0,503 ô wê wie dâr sarringe klungen .
0,504 dâ diu marc zesamene sprungen .
0,505 herhorn duzen
0,506 beche bluotes runnen . und vluzzen .

0,507 dâ belac vile manic breitiu schar .
0,508 mit bluote berunnen alsô gar .
0,509 Julius den sige nam .
0,510 Pompeius entran .
0,511 er vlôch in Egiptelant .
0,512 dannen tet er niemer mêr widerwant .
0,513 Pompeius erslagen lac .
0,514 Julius Cêsar in sît rach .
0,515 dô vröuwete sich der junge man .
0,516 daz er diu rîche elliu under sich gewan .
0,517 er vuor dô mit michelem gewalte .
0,518 wider ze Rôme swie er wolte .
0,519 Rômære in dô wole entviengen .
0,520 si begunden irzen den hêrren .
0,521 daz vuntent si im allerêrest ze êren .
0,522 want er eine habete den gewalt .
0,523 der êr was geteilet sô manicvalt .
0,524 den site hiez der hêrre .
0,525 alle diutische man lêren .
0,526 in den zîten ez geschach .
0,527 dannen der wîssage Daniel dâ vore sprach .
0,528 dâ der küninc Nabuchodonosor sîne troume sagete .
0,529 di er gesehen habete .
0,530 wie vier winde .
0,531 in dem mere vuoren vehtente .
0,532 und ûz dem mer giengen .
0,533 vier tier wilde .
0,534 diu bezeichnenent vier künige rîche .
0,535 di alle dise werlt solten begrîfen .
0,536 daz êrste tier was ein lêbarte .
0,537 der vier arenveteche habete .
0,538 der bezeichnenet den kriechischen Alexandrum .
0,539 der mit vier heren . vuor after lande .
0,540 unz er der werlt ende erkante .
0,541 mit zwein grîfen .
0,542 vuorte er sich selben zuo den luften .
0,543 in einem glasevazze .
0,544 liez er sich in daz mer vram .
0,545 nâch im wurfen sîn ungetriuwe man .
0,546 di ketene alsô vreissam .
0,547 si sprâchen . “nû dû gerne schouwest wunder .
0,548 nû sitze iemer an des meres grunde .”
0,549 dô sach der wunderlîche man .
0,550 ein tier vüre sich gân .
0,551 eines tages ze prîme .
0,552 unz an den dritten tac ze nône .
0,553 daz was ein grôz wunder .
0,554 vile dicke walzete iz in umbe .

0,555 dô gedâhte der listige man .
0,556 ob er ze dem lîbe trôst solte hân .
0,557 mit sîn selbes bluote .
0,558 daz scharpfe mer er dô gruozte .
0,559 als diu vluot des bluotes entvant .
0,560 si warf in wider ûz an daz lant .
0,561 er kom wider in sîne rîche .
0,562 vile wole entviengen in di Kriechen .
0,563 vile manic wunder erleit der selbe man .
0,564 ein dritteil er der werlte under sich gewan .
0,565 daz ander tier was ein bere wilde .
0,566 der habete drîvalte zende
0,567 der bezeichnenet driu künincrîche .
0,568 diu wider einem solten grîfen .
0,569 der bere was alsô vreissam .
0,570 von mennischensinne . ne mahte er niemer werden zam .
0,571 daz dritte ein vreislich eber was .
0,572 den tiurlîchen Julium bezeichnenet daz .
0,573 der selbe eber zehen horn truoc .
0,574 dâ mit er sîne vîande alle nider sluoc .
0,575 Julius betwanc alliu diu lant .
0,576 si dienten alliu sîner hant
0,577 wole bezeichnenet uns daz wilde swîn .
0,578 daz daz rîche ze Rôme sol iemer vrî sîn .
0,579 daz vierde tier was ein lewinne .
0,580 iz hête mennischlîchen sin .
0,581 iz hête mennischen ougen . und munt .
0,582 soliches tieres ne wart uns êr nie niht kunt .
0,583 im wuohs ein horn engegen dem himele .
0,584 di sternen vâhten im engegene .
0,585 daz bezeichnenet aber den Antichrist .
0,586 der noch in die werlt künftic ist .
0,587 den got mit sîner gewelte .
0,588 hin ze der helle sol senden .
0,589 der troum alsô ergienc .
0,590 als in der wîssage Daniel schiet .
0,591 Julius di treserkamere ûf brach .
0,592 er vant dâr inne michelen schatz .
0,593 er gebete diutischen holden .
0,594 mit silber und mit golde .
0,595 von diu wâren iermêr diutischen man .
0,596 ze Rôme liep und vorhtsam .
0,597 diu rîche er mit michelem gewalte habete .
0,598 dî wîle daz er lebete .
0,599 daz buoch saget uns vûre wâr .
0,600 niuwan vûnf jâr .
0,601 Rômære in ungetriuwelîche sluogen .
0,602 sîn gebeine si ûf di irmensûl begruoben .

0,603 de Augusto Cesare alse Julius wart erslagen .
0,604 Augustus daz rîche nâch im gewan .
0,605 von sîner swester was er geboren .
0,606 dô er ze rihtær wart erkoren .
0,607 swie er got niene vorhte .
0,608 iedoch er vride worhte .
0,609 in allem rîche .
0,610 gewonnen sie nie neheinen semelîchen .
0,611 an den stunten .
0,612 sweliche in dem rîche wâren gevangen . ode gebunden .
0,613 ode in decheinem karkære gestôzen .
0,614 di hiez der küninc ûz lâzen .
0,615 der küninc vile hêre .
0,616 er gebôt ienoch mêre .
0,617 er hiez schrîben allen disen umberinc .
0,618 beidiu muoter und kint .
0,619 beidiu wîp und man .
0,620 iegelîchez muose varn .
0,621 swanne ez geboren was .
0,622 daz liet kündet uns daz .
0,623 alle di ire hêren wâren entrunnen .
0,624 den en wolte er des rîches niht gunnen .
0,625 eines tages hiez er der vremeden slahen .
0,626 sô wir daz buoch hoeren sagen .
0,627 mêr denne drîzic tûsent lîbe .
0,628 manne und wîbe .
0,629 Cêsar Augustus .
0,630 dô gewarp er alsus .
0,631 er hiez im wûrken aber sâr .
0,632 ein wâge diu hiez didragma .
0,633 er gebôt in bî dem halse .
0,634 si gæben si ze zinse
0,635 arme und rîche .
0,636 di dâ wâren in sînem rîche .
0,637 diu vier pfenninge wac .
0,638 der zins stuont unz an den tac .
0,639 daz der wâre heilant .
0,640 von himele wart gesant .
0,641 uns allen ze trôste .
0,642 der uns von dem zinse erlôste .
0,643 Agrippa wart dô gesant .
0,644 daz er ze Rîne berihtete daz lant .
0,645 eine burc worhte dô der hêre .
0,646 Rômæren ze êren .
0,647 den namen gap er ir sâr .
0,648 er hiez si Agrippina .
0,649 Colonjâ ist si nû genant .
0,650 si zieret alliu vrenkischiu lant .

0,651 Mezze stifte ein sîn man .
0,652 Mêtîus geheizen .
0,653 Triere was ein burc alt .
0,654 die zierte Rômære gewalt .
0,655 dannen si den wîn verre .
0,656 sanden under der erde .
0,657 in steinîn rinnen .
0,658 den hêrren al ze minnen .
0,659 di ze Kölne wâren sedelhaft .
0,660 michel was der Rômære kraft .
0,661 Augustus der vile mære man .
0,662 Augusta hât noch von im namen .
0,663 vile gewalticlîche berihte er Rôme .
0,664 jâ truoc er di krône .
0,665 daz saget daz buoch vüre wâr .
0,666 sehs und vûnvzic jâr .
0,667 drî mânôde dâr übere .
0,668 Rômære wurben übele .
0,669 si verrieten im daz leben .
0,670 mit eiter vrumeten si im vergebene .
0,671 daz buoch kûndet uns sus .
0,672 daz rîche besaz dô Tiberius .
0,673 der gewan Rômæren . michel êre .
0,674 di wîsen redent er behielte . di sêle .
0,675 er vazzete sich über mere .
0,676 er vuor ze Jerusalêm mit here .
0,677 ein lant heizet Tiberiadis .
0,678 des sulet ir sîn gewis .
0,679 daz ervaht er dâ .
0,680 er ersluoc den küninc von Persîa .
0,681 ze wâr sagen ich ez iu .
0,682 daz rîche teilte er in vieriu .
0,683 dô er di heidene alle betwanc .
0,684 dô vuor er in diutischen lant .
0,685 er kom zuo einem wazzer heizet Tuonouwe .
0,686 dâ greif er wole ze bûwe .
0,687 ein stat worhte er dâ .
0,688 geheizen Tyburnîa .
0,689 nû heizet si aber Radisbona .
0,690 von gote ez bekom .
0,691 der küninc siechen began .
0,692 den siechtuom wile ich iu sagen .
0,693 wûrme alsô vreissam .
0,694 in sînem houbete wuohsen .
0,695 der im nieman mohte gebüezen .
0,696 nehein erzenîe was vrum .
0,697 im ne kunde nieman niht getuon .
0,698 daz im vrum wære .

0,699 dô sagete man im ze wære . ze mære .
0,700 wie ze Jerusalêm wære .
0,701 der allerwîsest man .
0,702 der ie in dise werlt kom .
0,703 sîn tugende manige .
0,704 sagete man dem künige .
0,705 wie er di tôten hiez ûf stân .
0,706 di miselsuht ab gân .
0,707 und koeme er im enzît .
0,708 er gæbe im wider den lîp .
0,709 mit einem worte .
0,710 der küninc ervröuwte sich harte .
0,711 er hiez im den arzât gewinnen
0,712 mit schatze oder mit gedinge .
0,713 mit lande oder mit eigene .
0,714 und mæhte er in geheilen .
0,715 er habete sîn minne . iemer mêre .
0,716 dâr zuo sprach er lônste es im wole gerne .
0,717 der bote huop sich an di vart .
0,718 als im vone hove geboten . wart .
0,719 er hiez Volûsîânus .
0,720 daz buoch nennet in sus .
0,721 dô er in di burc ze Jerusalêm .
0,722 begunde rîten unde gên .
0,723 dô vrâgete er di gesinden .
0,724 wâ er Jêsum mahte vinden .
0,725 den vile guoten arzât .
0,726 ode er wære in der stat .
0,727 ob er dannoch lebete .
0,728 oder wie er sich gehabete .
0,729 ein vrouwe was in den zîten dâ .
0,730 geheizen Veronicâ .
0,731 di got durch sîne gûete
0,732 ernerte von dem grimmigen bluote .
0,733 dannen hête si gesiechet ze wære .
0,734 zweier minner denne drîzic jâre .
0,735 als diu vrouwe vernam .
0,736 daz er von gote . vrâgen began .
0,737 si erweinte vil sêre .
0,738 si sprach “nû sage mir vile lieber hêrre .
0,739 ob dû Jêsum erkennest .
0,740 daz dû in sô rehte nennest .”
0,741 er sprach “vrouwe der keiser Tiberius .
0,742 der gebôt mir bî dem halse alsus .
0,743 daz ich êr niemer erwûnde .
0,744 unz ich den arzât . vûnte .
0,745 mac er in von sîn sühten geheilen .
0,746 jâ wile er im sîn rîche mit teilen .”

0,747 diu guote Veronicâ .
0,748 antwurte im sâr .
0,749 “ez ist ze wâre .
0,750 in dem dritten jâre .
0,751 daz in die juden viengen .
0,752 âne schulde in hiengen .
0,753 an dem dritten tage .
0,754 dô erstuont er von dem grabe .
0,755 ze unser gesihten vuor er ze himele .
0,756 ein vile hêrez bilede .
0,757 hân ich von sînen genâden .
0,758 daz manet mich sînes lîchnamen .
0,759 daz en lâz ich hinnen vûre nehein tac .
0,760 alsô lange ich nû leben mac .
0,761 ich ne welle sîne marter dâr an schouwen .”
0,762 der bote bat dô di vrouwen .
0,763 daz si in daz bilede lieze sehen .
0,764 si rou daz si im sîn hête verjehen .
0,765 der bote was biderbe . und wîse .
0,766 di vrouwen bat er lîse .
0,767 durch des selben gotes êre .
0,768 daz si daz bilede sande sînem hêrren .
0,769 daz er selbe muose sehen .
0,770 “mæhte im dechein genâde geschehen .
0,771 des hâst dû iemer mêre .
0,772 beide gevüere und êre .”
0,773 diu vrouwe hiez daz bilede vore tragen .
0,774 nieman kan iu gesagen .
0,775 welich – wunder diu vrouwe tet .
0,776 mit venjen und mit gebete .
0,777 mit herzen joch mit munde .
0,778 si sprach “dû mich an dem lîbe hier tæte gesunde .
0,779 nû genâde mir dort an der sêle .
0,780 dû bist aller engel hêre .”
0,781 der bote bat ie mêr und mêre .
0,782 daz si daz bilede sande sînen hêrren .
0,783 diu vrouwe sprach ze noete .
0,784 daz si iz niemer gelobete .
0,785 si müese selbe dâ mit varen .
0,786 daz si ez mit êren muose bewaren .
0,787 ô wê wie vrô der bote was .
0,788 daz diu vrouwe gelobete daz .
0,789 Pilatum den grâven .
0,790 hiez er schiere vâhen .
0,791 er hiez in binden .
0,792 di vuoze und di hende .
0,793 er hiez in an ein schef werfen .
0,794 nieman getorste im gehelfen .

0,795 er vuorte in sînem hêren .
0,796 er brâhte im grôz êre .
0,797 als in der keiser an sach .
0,798 unzornelîche er sprach .
0,799 “mich wundert harte .
0,800 dîner langen verte .
0,801 nû weist dû wole daz ich niene mac
0,802 ich warte dir alsô manigen tac .
0,803 daz mich sîn wole muoz erlangen .
0,804 mit grôzen sühten bin ich bevangen .”
0,805 der bote sprach “daz ich hêre sô lange ûz was .
0,806 niene zürne dû daz .
0,807 di juden hânt den arzât erhangen .
0,808 und ist dir leider übele ergangen .
0,809 si redent daz er an dem dritten tage .
0,810 stüente lebentic von dem grabe .
0,811 und redent alle . er vüere offenlîche hin ze himele .
0,812 diz lustsam bilede .
0,813 hât dir dise vrouwe ze minnen brâht .
0,814 ich getrûwe wole dîn werde guot rât .
0,815 dich manet diz guote wîp .
0,816 daz dû allen dînen lîp .
0,817 vile wirdiclîche bestrîches .
0,818 dâ müezen dir entwîchen .
0,819 dîne sühte alsô manicvalt .
0,820 der hêre habete michelen gewalt .”
0,821 dô hiez der küninc lobesam .
0,822 daz bilede vüre sich ûf haben .
0,823 er schouwete ez hin und her .
0,824 vile inniclîche sprach er .
0,825 “daz was ze wâre .
0,826 ein vile rehter heilære .”
0,827 vile schône er im engegene neic .
0,828 daz houbet er dâr an streich .
0,829 er kuste ez mit dem munde .
0,830 der küninc wart gesunde .
0,831 von allen sînen noeten .
0,832 di wûrme vielen tôte .
0,833 nider zuo der erde .
0,834 ûf spranc dô der hêre .
0,835 gesunt und heil .
0,836 dô vrôuwten sich algemeine .
0,837 alle Rômære
0,838 daz wâren guotiu mære . –
0,839 alse der küninc ersach .
0,840 daz im arges niene was .
0,841 er swuor ûf dem hêren bilede .
0,842 er ne gelæge tôt dâ nidere .

0,843 er hieze zervüeren di stat .
0,844 dâ der hêrre gemarteret wart .
0,845 si arneten in vile tiure .
0,846 mit swerten . und mit viure .
0,847 “si vile unreine diet .
0,848 nû en sol ir genesen niht .
0,849 si müezen ze dem tôde .
0,850 dâ mit sol man in lônên .
0,851 daz si nâmen uns den hêrren .
0,852 si entgeltent sîn an dem lîbe sêre .”
0,853 dô sande er Vespasianum .
0,854 und sîn sun Titum .
0,855 di vazzeten sich über mere .
0,856 mit vile kreftigem her .
0,857 dâ schein Rômære gewalt .
0,858 über alle jêrusalêmischen lant .
0,859 allez daz lantvolc .
0,860 in di ein stat vore in vlôch .
0,861 beidiu kint und wîp .
0,862 dâ nâhete in daz zît .
0,863 daz in dâ vore gesaget was .
0,864 daz êvangelium kûndet uns daz .
0,865 dô unser hêrre vuor in di burc ze Jerusalêm .
0,866 und zuo der marter sol gên .
0,867 sînen lieben holden .
0,868 di im nâch wolten . volgen .
0,869 di vile edelen vrouwen .
0,870 klageten in mit triuwen .
0,871 si wunden ire hende .
0,872 dô kêrte sich unser hêrre wider umbe .
0,873 di stat er an sach .
0,874 daz wort er weinente sprach .
0,875 “ô wê kint von Jerusalêm .
0,876 waz iuch ze leide muoz geschehen .
0,877 weinet niht mînen tût .
0,878 mîn vater hât iz von himel alsô geordenet .
0,879 ir meget wole weinen diu dinc .
0,880 diu her nâch kûnftic sint .
0,881 iu kumet der tac .
0,882 daz nieman dem anderem gehelfen ne mac .
0,883 disiu burc wirdet bestanten .
0,884 von iuweren vîanden .
0,885 der undereste stein wirdet der oberest .
0,886 hier geschihet michel untrôst .
0,887 ir werdet zervüeret .
0,888 allez iuwer geslehte zerstoeret .
0,889 iuwer sâme in Israhêl .
0,890 gesamenent sich niemer mêre .

0,891 want ir des zîtes niht erkantet .
0,892 dô iu got vride ze hûse sande .
0,893 ir suochet ungenâde .
0,894 diu kumet iu ze wære .
0,895 der vater wirdet von dem kinde gescheiden .
0,896 daz müezet ir albalde klagen und weinen .”
0,897 diu gotes wort wurden wâr .
0,898 di hêrren kômen grimmiclîchen dar .
0,899 Titus huotte wole dâ vore .
0,900 ze dem ôsterem bürge tore .
0,901 der hunger in der bürge rîsen began .
0,902 jâ sameneten sich di jungen man .
0,903 swâ si decheinen rouch sâgen .
0,904 dare îlten si zuo gâhenne .
0,905 di türe si nidere stiezen .
0,906 in dem hûse si niht verliezen .
0,907 des si geniezen mahten .
0,908 ire lîp si dâ mit nerten .
0,909 eines tages iz geschach .
0,910 ein wîp in eineme hûse gesaz .
0,911 ire man wart ir erslagen .
0,912 vile schiere begunde si weinen und klagen .
0,913 si want ire hende .
0,914 si sprach “war schol ich vile arme wenden .
0,915 der mîner manigen sêre .
0,916 leider nû ne mac ich leben mêre .
0,917 hiute ist der vierde tac .
0,918 daz ich mazzes nie ne pflac .
0,919 der lîp hât mir geswichen .
0,920 daz wort ne mac ich niht gesprechen .
0,921 iz nâhet mir zuo dem tôde .
0,922 di heidene von Rôme .
0,923 nement mir den lîp mîn .
0,924 ô wê liebez kindelîn .
0,925 jâ en megen wir des niht über werden .
0,926 wir müezen doch von den heidenen ersterben .
0,927 nû gevriste mich eine wîle .
0,928 mit dîn selbes lîbe .
0,929 lâ mich ezzen .
0,930 daz dunket mich nû bezzer .
0,931 di wüetende heiden .
0,932 di ertoeten uns beide .”
0,933 alsô si daz wort volsprach .
0,934 daz kint si erstach .
0,935 si sôt und briet .
0,936 als ir der tiuvel daz geriet .
0,937 vile schiere vlouc in die burc mære .
0,938 daz dâ bî wære .

0,939 ein rîchez hûs .
0,940 dâ gienge michel rouch ûz .
0,941 sâr ze den stunten .
0,942 dar îlten di tumben .
0,943 di wende nider houwen .
0,944 si ne en mahten niht getrûwen .
0,945 der jâmerlîchen mære .
0,946 di leidigen roubære .
0,947 hiezen in ze ezzenne geben .
0,948 diu vrouwe îlte daz kint nemen .
0,949 si truoc ez dem gesinden .
0,950 si sprach “hier meget ir vinden .
0,951 ein wunderlich maz .
0,952 wolte got . wære iu iht desten baz .
0,953 daz was mîn einigez kindelîn .
0,954 nû weiz wole mîn trehtîn .
0,955 ich gæbe ez iu vile gerne .
0,956 leider nû ne hân ich alles ezzenes mêre .”
0,957 sâr bî dem worte .
0,958 si erkômen sô harte .
0,959 daz über alle di stat .
0,960 grôz jâmer wart .
0,961 jâ klagete man und wîp .
0,962 daz unvroelîche zît .
0,963 daz iz bî in solte geschehen .
0,964 dem tôde bâten si sich alle geben .
0,965 in ein schrîpgademe .
0,966 kômen dô zesamene .
0,967 di allerwîsesten
0,968 di si under in westen .
0,969 si nâmen ire mezzen .
0,970 si sprâchen ez dûhte si bezzer .
0,971 daz si sich selbe toeteten .
0,972 êr si des di heidene nôtten .
0,973 daz si vore den apgoten .
0,974 iemer iht soleten gebeten .
0,975 Josephus hiez ein wîser man .
0,976 alsô schiere er den rât vernam .
0,977 mit micheln listen .
0,978 muose er sich vristen .
0,979 er sprach “swer im selbe tuot den tô .
0,980 der ist êwiclîche verdamnet .
0,981 nû vernemet juden algemeine .
0,982 marterent uns die heiden .
0,983 ode brennent si uns hier inne .
0,984 sô haben wir doch gedinge .
0,985 daz wir ze jungeste ernern unser sêle .
0,986 nû vernemet ouch mêre .

0,987 hier zuo râte allermenegelîch .
0,988 des ist nôt und ist billich .
0,989 vernemet alleumbe .
0,990 wîse und tumbe .
0,991 swelich rât iu baz gevalle .
0,992 des volgen wir denne alle .
0,993 der ist ouch mir liep .
0,994 wellt ir iuch es verrer besprechen niht .
0,995 sô lât unser genôze .
0,996 vinden mit lôze .
0,997 weliche einandere sulen erslahen .
0,998 daz wir deste minnere sünde haben .”
0,999 dô sâzen di genôze .
0,1000 si suochten mit lôze .
0,1001 unze si alle einander erstâchen .
0,1002 dô geviel diu gotesrâche .
0,1003 über alle êbrêische diet .
0,1004 dâ vore wâren si gote liep .
0,1005 und wâren trûte .
0,1006 von ire grôzen unkiusche .
0,1007 und von ire unzûhte .
0,1008 verluren si mit rehte .
0,1009 di hulde ire hêrren .
0,1010 zervüeret sint si iemer mêre .
0,1011 alsô Josephus ersach .
0,1012 daz daz michel wunder geschach .
0,1013 er îlte ûf Dâvîdes veste .
0,1014 dâ er di leiden geste .
0,1015 wolte gerne beschouwen .
0,1016 dô ersach er entriuwen .
0,1017 den vermezzen Titum .
0,1018 spehente dâ umbe rîten .
0,1019 er sprach “ich bite dich hêre .
0,1020 durch des roemischen kûninges êre .
0,1021 nere im den allerwîsesten man .
0,1022 der dem kûninge wole gesagen kan .
0,1023 von aneenge . der werlte .
0,1024 wie si allerêrst got geschüefe .
0,1025 dâr nâch von allen mennischen kûne .
0,1026 er hât iemer mit mir wünne .”
0,1027 dô sprach Titus der milte .
0,1028 “hâs dû dâ ûf iht schilde .
0,1029 lâ dich dâ mit her ze tal .
0,1030 daz her hilfet dir überal .
0,1031 in der burc bist dû mir verre .
0,1032 hier ûze hæte ich dich vile gerne .”
0,1033 Josephus zwêne schilde er nam .
0,1034 under iewederen arm .

0,1035 er lie sich von der hoehe .
0,1036 sîn geverte ne was niht schoene .
0,1037 wan daz ez got wolte .
0,1038 daz er dannoch genesen solete .
0,1039 er vlouc under daz her .
0,1040 Titus hiez in neren .
0,1041 sît schreip er ein buoch .
0,1042 daz ist nütze und guot .
0,1043 des megen alle di wole jehen .
0,1044 di daz buoch hânt geleren .
0,1045 Vespasianus
0,1046 und sîn sun . Titus .
0,1047 di hiezen alle ire man .
0,1048 mit sturme zuo der burc gân .
0,1049 mit michelem grimme .
0,1050 dâ was nieman inne .
0,1051 di di hant ie ze were ûf gehuoben .
0,1052 swie man si marterete und slüege .
0,1053 si wâren alle verzaget .
0,1054 als in dâ vore was gewîssaget .
0,1055 di êr wâren küene .
0,1056 di wurden alle bloede .
0,1057 di êr wâren siges helde .
0,1058 di wurden alle vremede .
0,1059 der schalke werc si worhten .
0,1060 di man êr vorhte .
0,1061 dô wurden di knehte .
0,1062 di von adele und von rehte .
0,1063 erwelte vürsten solten sîn .
0,1064 den zurnte dô mîn trehtîn .
0,1065 dô wurden di gescheiden .
0,1066 di dâr êr wâren heime .
0,1067 mit micheln êren .
0,1068 sâzen dâ vore ire althêren .
0,1069 Saul . und Jonathas .
0,1070 ô wê welich hêrschaft bî in was .
0,1071 dâ saz bî Dâvît und . Salomon .
0,1072 des sulen wir iemer got loben .
0,1073 von ire wîsheit .
0,1074 vröuwet sich noch diu kristenheit .
0,1075 dâ saz der hêrre Mathathîas .
0,1076 und sîn sun Judas .
0,1077 Herôdes lebete mit grimme .
0,1078 der ne hête ze gote nehein minne .
0,1079 sîn êre muosen zergên .
0,1080 jâ stuont diu stat ze Jerusalêm .
0,1081 mit michelen êren .
0,1082 unz si marterten unsern hêrren

0,1083 dô ne mahte ire hêrschefte niemer sîn .
0,1084 des wart des tages wole anschîn .
0,1085 di burc di hêrren gewunnen
0,1086 si hiezen ze den selben stunten .
0,1087 in allen vier enden .
0,1088 daz viur dâr an zünden .
0,1089 si branten wîp und kint .
0,1090 daz wâren jâmerlîchiu dinc .
0,1091 di gruntveste hiezen si ûz der erde graben .
0,1092 sô wir daz buoch hoeren sagen .
0,1093 Rômære gewalt dâr schein .
0,1094 der allerunderest stein .
0,1095 gelac ze alleroberest .
0,1096 noch was daz der meist untrôst .
0,1097 an ketenen . und an snüren .
0,1098 hiez man si veile vûeren .
0,1099 drîzic umbe einen pfenninc geben .
0,1100 wie mahte in iemer wirs geschehen .
0,1101 in ze laster und ze schanden .
0,1102 si sint in vremeden landen .
0,1103 unz an den jungesten tac .
0,1104 daz in nieman gehelfen ne mac .
0,1105 dô vrôuwten sich di hêrren .
0,1106 der manicvalten êren .
0,1107 diu in geschehen was .
0,1108 der küninc selbe lobete daz .
0,1109 si kêrten wider ze Rôme .
0,1110 ire antvanc wart schoene .
0,1111 Tiberius rihte daz rîche vûre wâr .
0,1112 driu und drîzic jâr .
0,1113 und eines mânôdes mêre /
0,1114 dô vergâben si ouch dem hêren .
0,1115 nû saget uns daz buoch sus .
0,1116 daz rîche besaz dô Gâjus .
0,1117 bî sînen zîten ein michel nôt geschach .
0,1118 ein helleviur dâ ze Rôme ûz brach .
0,1119 neweder wazzer noch wîn .
0,1120 ne mahte dâ nehein vrume sîn .
0,1121 si ne mahten iz nie vertreten .
0,1122 ze Rôme in der stat .
0,1123 wart michel wuoft . und nôt .
0,1124 vore stanke lac ir vile tût .
0,1125 si ne mahten sîn nehein ûzkunft haben
0,1126 si versuochten manige wîssagen .
0,1127 ze jungeste si ire opfer ûf huoben .
0,1128 ze einem betehûse . si iz truogen .
0,1129 si beteten vile / tiure .
0,1130 daz er si erlôste von dem viure .

0,1131 der got hiez Jupiter .
0,1132 alles weters gewalt hête er .
0,1133 si gehiezen im ze êren .
0,1134 sîn lop iemer ze mêrenne .
0,1135 Jupiter antwurte in dô .
0,1136 des wurden Rômære vile vrô .
0,8096 nâch dem jungesten segene .
0,8097 dô îlten di gotesdegene .
0,8098 wider an daz gerihte .
0,8099 dô ervulten si di pfâhte .
0,8100 der küninc rihte sînen hov .
0,8101 sô stât iz geschrîben noch .
0,8102 umbe herzogen und umbe grâven .
0,8103 und alle di under in wâren .
0,8104 umbe alle rîtæres namen .
0,8105 wie ire leben solte sîn getân .
0,8106 daz swert si umbe gûrten .
0,8107 daz kriuze dâr an vuorten .
0,8108 besigelt an dem swerte .
0,8109 wider des tiuveles geverte .
0,8110 di kristenheit ze beschirmenne und ze bevogetenne .
0,8111 vile manige sînen wîstuom dô lobeten
0,8112 er gebôt umbe bûliute und umbe koufman .
0,8113 daz si vride solten hân .
0,8114 und swer in ire guot næme .
0,8115 daz der des küninges vîant wære .
0,8116 dô kom iz an den sunnentac .
0,8117 der bâbes des ambetes pflac .
0,8118 der gotes êwarte .
0,8119 den küninc er dô garwete .
0,8120 er segenete im sîne regalia .
0,8121 ûf satzte er im sâr .
0,8122 ein tiurlîche krône .
0,8123 elliu diu stat ze Rôme .
0,8124 îlte im zuo gâhenne .
0,8125 dô si iz ersâhen
0,8126 daz iz sô wünniclich was .
0,8127 iz geviel in ie baz und baz .
0,8128 dô er in ze keiser gewîhte .
0,8129 gelouben und bîhte .
0,8130 er in allen vore sprach .
0,8131 ich wæne ze Rôme ie sô michel vröuwede geschach .
0,8132 der bâbes gie ze dem vrônen tische .
0,8133 dô sanc er gewisse
0,8134 von der gotes urstende .
0,8135 an des segenes ende .
0,8136 der keiser ûf ein hoehe trat .
0,8137 einer stille er bat .

0,8138 er sprach "ô wole ir romani .
0,8139 nû verstêt iu wole dâ bî .
0,8140 got ruochte sich ze erbarmenne
0,8141 über unsich mennische arme .
0,8142 er sande uns sîn selbes sun .
0,8143 ze erloesenne uns von den sünden .
0,8144 êr beteten wir algemeine
0,8145 an holz und an steine .
0,8146 daz was des tiuveles getroc .
0,8147 nû tuot ir ez durch den wârû got .
0,8148 lât iuch riuwen .
0,8149 daz wir haben getân .
0,8150 werden dem gote gehôrsam der uns von nihte geschaffen hât .
0,8151 in sînen genâden allez unser leben stât .
0,8152 er hiez von nihte werden .
0,8153 himel und erden .
0,8154 er heizet unser rehter vater . wir heizen sîniu kint .
0,8155 alle di im gehôrsam sint .
0,8156 di besitzent sîn rîche .
0,8157 nû sulen wir wider grîfen .
0,8158 dienen unserem rehten schepfære .
0,8159 lât iu wesen unmære .
0,8160 diu vile unreinen getroc .
0,8161 diu unser vater hânt gemachtet .
0,8162 swer di in daz viur wirfet .
0,8163 und in dâr ûz niene hilfet .
0,8164 si müezen ze pulvere brennen .
0,8165 waz maht ir an dem gewinnen .
0,8166 swaz mennischenhant kan gemachen .
0,8167 daz mac ouch mennischenhant zerbrechen .
0,8168 si hânt ougen und gesehent niht .
0,8169 si ne erkennen di vinster noch daz licht .
0,8170 si hânt ôren .
0,8171 und en megen dâr mite niht gehoeren .
0,8172 si hânt nase âne smac .
0,8173 si ne wîzen tac noch naht .
0,8174 si ne megen ze neheiner stunte .
0,8175 gesprechen mit dem munde .
0,8176 sich en üebe der tiuvel dâr inne .
0,8177 si hânt kelen âne stimme .
0,8178 vuoze noch di hende .
0,8179 mügen si niender gewenden .
0,8180 si hânt vuoze âne ganc .
0,8181 si ne habent gesin noch gedanc .
0,8182 si sint gar unreine .
0,8183 ich bite iu algemeine .
0,8184 erkennet einen wâren got .
0,8185 den Silvester habet geprediget .

0,8186 gehabet iuch ze dem heiligem Kriste .
0,8187 er ist ein gruntveste .
0,8188 aller guoten dinge .
0,8189 habet ir zuo im minne .
0,8190 er ist aneenge und ende .”
0,8191 si huoben ûf die hende .
0,8192 si lobeten mîn trehtîn .
0,8193 der micheln genâden sîn .
0,8194 di er zuo in hête getân .
0,8195 sô wir diu buoch hoeren sagen .
0,8196 ir wart getoufet an der stunt .
0,8197 mêr denne siben tûsent
0,8198 âne wîp . und âne kint .
0,8199 daz wâren lobelîche dinc .
0,8200 Helena dô si vernam .
0,8201 wie ez umbe den sun was getân .
0,8202 daz er di kristenheit hête entvangen .
0,8203 si en twalte niht langer .
0,8204 si hiez schrîben brieve .
0,8205 si entbôt ire sune schiere .
0,8206 dem tiurlîchen Constantinô .
0,8207 semper augusto .
0,8208 müeterlîche minne .
0,8209 zuoversiht unde gedinge .
0,8210 und alle küninclîch êre .
0,8211 entbôt si dem tiurlîchen hêrren .
0,8212 “ô wê lieber sun mîn .
0,8213 nû ist übel an dir schîn .
0,8214 daz ich dich zôch ze êren .
0,8215 Rômæren . ze eineme hêrren .
0,8216 sol ich dich hân verloren .
0,8217 wie hâs dû mîn êre sô verkoren .
0,8218 dîn vater Constantinus .
0,8219 rihte elliû roemischen hûs .
0,8220 iz was von im ungehoeret .
0,8221 daz er sich iemer hête gekêret
0,8222 an sôgetâne trûgeheit .
0,8223 waz woltest dû der kristenheit .
0,8224 den di kristene an betent .
0,8225 der ist ze Jerusalem vore der stete .
0,8226 vile lange nû ervûlet .
0,8227 swer an den geloubet .
0,8228 der ist vore gote verteilet .
0,8229 wænest dû daz er dich habe geheilet .
0,8230 er ne hât sîn niht getân .
0,8231 dû solt iz anders verstân .
0,8232 iz ist von dîner micheln güete . geschehen .
0,8233 dû solt wider an unser gote jehen .

0,8234 diene dem mit triuwen .
0,8235 lieber sun lâ dich daz riuwen .
0,8236 daz dû ez an hâst vergangen
0,8237 mîn herze ist bevangen .
0,8238 mit leide und mit sêre .
0,8239 vrô ne wirde ich niemer mêre .
0,8240 dû ne wellest dich von der trûgeheit kêren .”
0,8241 sô entbôt si dem tiurlîchen hêren .
0,8242 Constantinus der rîche .
0,8243 der entvieng di boteschaft tougenlîche .
0,8244 daz Rômære . iht innen wurden .
0,8245 waz der heidene boten dâ wurben
0,8246 noch sîn lieber meister
0,8247 vile listiclîche warp er .
0,8248 sîne boten er sande .
0,8249 ze bittinischen landen .
0,8250 dâ was diu kûningîn Helena .
0,8251 di boten vunt si dâ .
0,8252 er entbôt der vrouwen .
0,8253 sunelîche triuwe .
0,8254 ir gezæme sô grôz êre .
0,8255 sô in dirre werlte nieman mêre .
0,8256 aller roemisch gewalt
0,8257 stuont in ire hant .
0,8258 swaz ire wille wære .
0,8259 wie wole im des gezæme .
0,8260 “ô wê liebiu muoter mîn
0,8261 nû lâ dir niht leit sîn .
0,8262 daz ich dir klagen wile .
0,8263 mîner noete was sô vile .
0,8264 daz dir daz nieman gesagen ne mac .
0,8265 unz mir kom der tac .
0,8266 daz mîn got sô vile ruochte .
0,8267 daz mich sîne boten suochten .
0,8268 und ich ervollete ire gebot .
0,8269 dâ wart ouch ich erlediget .
0,8270 ich entvieng di heiligen kristenheit .
0,8271 ich weiz wole di wârheit .
0,8272 an den ich mich hân gewendet .
0,8273 daz in sîn vater hât gesendet .
0,8274 ze trôste und ze heile .
0,8275 allen den gemeine .
0,8276 di gelouben zuo im wellent hân .
0,8277 den ne mac an nihte missegân .
0,8278 di besiztent den liechten tac .
0,8279 er ist aller engel kraft .
0,8280 er ist aller rehten licht .
0,8281 diu sunne diu schînet niht .

0,8282 wan als er gebiutet . und wile .
0,8283 sîner genâden ist sô vile
0,8284 daz dir ez mennischen zunge .
0,8285 niemer mac gekünden .
0,8286 noch mennischen ougen .
0,8287 niemer geschouwen .
0,8288 noch mennischen ôren .
0,8289 niemer sulen gehoeren .
0,8290 noch mennischen herze erdenken ne mac .
0,8291 dar er uns geleitet hât .
0,8292 nû gewin dû sîne hulde .
0,8293 daz wile ich an dich gedingen .
0,8294 des verlihe dir mîn trehtîn .
0,8295 swie dû mir denne gebiutest sô wile ich sîn .”
0,8296 alse Helena di brieve gelas .
0,8297 wie trûric ire herze was .
0,8298 si hiez schrîben brieve .
0,8299 si entbôt ire sune schiere .
0,8300 daz si di stat ze Rôme .
0,8301 im ze leide wolte stoern .
0,8302 und elliu roemischen rîche .
0,8303 er muose selbe schantliche .
0,8304 leben iemer mêre .
0,8305 er ne wolte sich von der trûgeheit kêren .
0,8306 Constantinus der guote .
0,8307 niht langer er ez verheltn ne mahte .
0,8308 er entbôt iz sînem meister .
0,8309 dem guotem sancte Silvester .
0,8310 alse der heilige man .
0,8311 di boteschaft vernam .
0,8312 er antwurte im sus .
0,8313 “– deum laudamus .
0,8314 lobe dich hêrre trehtîn
0,8315 der vile micheln genâden dîn .
0,8316 want dû allen dînen gehieze .
0,8317 di sich iemer an dich verliezen .
0,8318 und æhtesal wolten
0,8319 in dînem namen dulten .
0,8320 daz si iemer gewislîche .
0,8321 bûweten dîn rîche .”
0,8322 der bâbes sprach zuo dem boten dô .
0,8323 “nû sage dû dem kûninge Constantinô .
0,8324 er mac wole vrô sîn
0,8325 jâ wile selbe mîn trehtîn .
0,8326 sîn namen an im geêren .
0,8327 di kristenheit gemêren .
0,8328 ein sent müezen wir loben .
0,8329 lâzen wir zesamene komen

0,8330 wîse . und alte .
0,8331 di juden und heiden walten
0,8332 dâr engegen vüeren wir diu kint .
0,8333 diu in geistlichem lebene sint .
0,8334 vernemen di rede iewederthalp .
0,8335 lâzen mîn trehtîne . den gewalt .
0,8336 sweliche mit rehte werden überwunten .
0,8337 daz di an den stunten
0,8338 ire gemüete kêren .
0,8339 swie si der heilige geist lêre .
0,8340 habe diu künigîn ire gerihte denne .
0,8341 swie ir got von himele verhenge .”
0,8342 der rât dûhte den küninc guot .
0,8343 sîn trûrigez muot .
0,8344 im dô slîfen began .
0,8345 er hiez im gewinnen sîne man .
0,8346 er entbôt der küniginne .
0,8347 dienst und minne .
0,8348 al daz der sun der muoter entbieten solete .
0,8349 ob si ire zorne entlîben wolte
0,8350 und wolte si ein sent loben .
0,8351 lieze zesamene komen
0,8352 der heidene wîsen schribære .
0,8353 und di der ê under den juden pflægen .
0,8354 vernæmen di rede allenthalben .
0,8355 got hête in sîner gewalt .
0,8356 daz er selbe eroffenete .
0,8357 sweliche under in reht hêten .
0,8358 alse diu künigîn di boteschaft vernam .
0,8359 ire wîseste man .
0,8360 hiez si ir gewinnen
0,8361 mit michelem grimme .
0,8362 beriet si sich drî tage .
0,8363 si sprach si solte den sent hân .
0,8364 der kristenheit ze vâren .
0,8365 si sprâchen ze alwære
0,8366 si ne mahte in niemer nâher komen .
0,8367 dâ hêten Rômære den lîp verloren
0,8368 sô man den bâbes überredete .
0,8369 daz man si alle houbette .
0,8370 diu künigîn . sprach zuo dem boten dô .
0,8371 “nû sage Constantinô .
0,8372 mir ist vile swære .
0,8373 daz er einem alten trügenære .
0,8374 hât gevolget sô verre .
0,8375 den sent suoche ich gerne .
0,8376 und wile selbe sehen .
0,8377 wannen daz sî geschehen

0,8378 daz mîn sun ist kristen .
0,8379 Silvesteren ne helfent neheine boese liste .
0,8380 wirdet er überwunden
0,8381 er muoz an den stunten .
0,8382 ersterben schantlîche .
0,8383 ich zerstoere elliu roemische rîche .”
0,8384 diu kûningîn hiez îlen .
0,8385 ire brieve schrîben .
0,8386 ze den juden . und ze den heidenen
0,8387 si entbôt in algemeine .
0,8388 di wîstuomes pflâgen
0,8389 daz si schiere ze hove kômen
0,8390 und alle di swert mahten leiten .
0,8391 si kômen wider der kristenheite .
0,8392 mahte si iz gevüegen .
0,8393 si wolte di kristenheit alle zervüeren .
0,8394 daz mære schiere vlouc
0,8395 über allez heidenischez volc .
0,8396 in wart diu boteschaft liep .
0,8397 sich ervrôuwete elliu heidenische diet .
0,8398 der bâbes was spæte . und vruo .
0,8399 des en irret in nehein müeje .
0,8400 sîner ruowe was lützel .
0,8401 der kristenheite was er nütze .
0,8402 sîne boten er sande
0,8403 von lande ze lande .
0,8404 allen gelêrten . hêrren .
0,8405 daz si durch des wâren gotes êre .
0,8406 alt und junge
0,8407 koemen ze der samenunge .
0,8408 und ze helfe der kristenheite .
0,8409 vile michel was sîn arbeit .
0,8410 der keiser gebôt gemeinlîche .
0,8411 über alliu sîn rîche .
0,8412 swer daz swert leite .
0,8413 er koeme ze helfe der kristenheite
0,8414 er verbôt umbe kint und umbe wîp .
0,8415 daz di niene koemen an den strît .
0,8416 und di in grôzen alter schinen .
0,8417 daz di alle heime beliben .
0,8418 iz en wære ein sô statehaft man .
0,8419 der spîse und gewæfen wole mahte hân .
0,8420 und des lîbes alsô wære .
0,8421 daz er in des keisers schar zæme .
0,8422 der bâbes gebôt sînhalp .
0,8423 über allen geistlîchen gewalt .
0,8424 si maneten daz liut verre .
0,8425 durch willen unsers hêrren .

0,8426 man gap ez in ze bûze .
0,8427 ire geverte wart lûter . und sîeze .
0,8428 vile schiere was daz getân .
0,8429 dô îlte man vûre man .
0,8430 dô nam allermannegeîich .
0,8431 ein rôtez kriuze vûre sich .
0,8432 si lobeten und sungên
0,8433 mit herzen . und mit munde .
0,8434 si bâten . mîn trehtîn .
0,8435 daz er in genædic wolte sîn .
0,8436 daz er ire geleite wære .
0,8437 und alles ire gevertes pflæge .
0,8438 di kristene vuoren vroelîche .
0,8439 durch welhischiu rîche .
0,8440 si kêrten an des meres stat .
0,8441 vile lustsam . wart diu hervart .
0,8442 der keiser koste ire here .
0,8443 und schouwete ire wîcwere .
0,8444 dô er dô rehte ersach .
0,8445 wie vroelîche er sprach .
0,8446 “geêret und gelobet sîs dû hêrre Krist .
0,8447 daz dû des wirdic bist .
0,8448 daz alsus manic kristenman .
0,8449 sich iemer sol gesamenen in dînem namen .”
0,8450 er manete got verre .
0,8451 daz im niene mahte gewerren .
0,8452 der micheln heidene here .
0,8453 er sprach “wir hân sôgetân her .
0,8454 ist daz got der kristenheite ruochet .
0,8455 und iz di heiden an uns versuochent .
0,8456 si ne megen uns schantlîche enttrinnen .
0,8457 ir ne kumet niemer neheiner hinnen .
0,8458 und koeme engegen uns elliû irdenischiu diet .
0,8459 wir verzageten an der kristenheite niht .”
0,8460 Helena diu vrouwe .
0,8461 diu wolte ire her schouwen .
0,8462 di vulten berc und tal .
0,8463 vile michel wart der herschal
0,8464 si hêten grôz übermuot .
0,8465 sô ie der unsælige tuot .
0,8466 si schriben sich an der stunt .
0,8467 vehtentes volkes driu hundert tûsent
0,8468 sehs und drîzic tûsent . dâr übere .
0,8469 si gedâhten übele
0,8470 si wolten mit roube und mit brande .
0,8471 in roemischem lande .
0,8472 haben ire willen
0,8473 dâr nâch begunden si vaste ringen .

0,8474 Constantinus der guote .
0,8475 boten sande er sîner muoter .
0,8476 durch ir selber êre .
0,8477 si erwelte ir vûnf hundert althêren
0,8478 di in den zûhten wâr .
0,8479 daz si sentreht vernæmen
0,8480 und si kômen vridelîche zuo der stat .
0,8481 vile tiure er di muoter des bat .
0,8482 wande misselich volc .
0,8483 ze neheiner rede niene touc .
0,8484 mit den ne mahte sendes niht sîn .
0,8485 dô sprach diu kûningîn .
0,8486 wie gerne si tæte .
0,8487 swes si der sun gebæte .
0,8488 ze Turaz wart der sent gelobet .
0,8489 dar kom der roemische voget .
0,8490 dar kom ouch sîn meister .
0,8491 der guote sancte Silvester .
0,8492 dar kom ze wære
0,8493 patriarche und kardenâle .
0,8494 dar kômen einlif hundert krumber stebe .
0,8495 sô wir diu buoch hoeren sagen .
0,8496 di kristene schriben sich an der stunt .
0,8497 vehtentes volkes zehenzic tûsent .
0,8498 ze wære sagen ich iz iu .
0,8499 und drîzic tûsent und driu .
0,8500 diu kûningîn hiez kûnden ire ban .
0,8501 über aller slahte man .
0,8502 swer in dem sende . decheinen strît hüebe .
0,8503 daz man im daz houbet ab slüege .
0,8504 des anderen morgenes vile vruo .
0,8505 der bâbes gerwete sich dô .
0,8506 patriarche und kardenâle .
0,8507 und alle di im dâ zuo nutze wâren .
0,8508 er sanc von dem heiligen geiste eine messe
0,8509 want er vile wole weste .
0,8510 der kûninginne ungemüete .
0,8511 er bat got den guoten
0,8512 daz er ire herze erkante .
0,8513 unde ouch im den heiligen geist sande .
0,8514 der im sôgetâne rede gæbe .
0,8515 diu sînem namen gezæme .
0,8516 diu kûningîn an ire gerihte gesaz .
0,8517 daz buoch kûndet uns daz .
0,8518 der kûninc leitte den bâbes dar
0,8519 im volgete ein wünniclich schar .
0,8520 diu gote von himel wole gezam .
0,8521 dâ was manic geistlich man .

0,8522 den sent erhuop diu künigîn .
0,8523 si sprach “alle di dâr zuo geloubet sîn .
0,8524 di hoeren her zuo .
0,8525 ich wile eine nôtlîche rede tuon .
0,8526 dô ich sent gelobete und gebôt .
0,8527 daz tet ich durch di micheln nôt
0,8528 daz ich mînen sun . hân verloren .
0,8529 durch daz bin ich ûz komen .
0,8530 daz ich gerne . wile besehen .
0,8531 wannen daz sî geschehen .
0,8532 daz er sîn ê hât verlâzen .
0,8533 und mich aller mîner êren wile bestôzen .
0,8534 und ist daz Silvesteres rât .
0,8535 daz er di trûgeheit an vergangen hât .
0,8536 und ist worden kristen .
0,8537 ich en wile iz nû niht langer vrîsten .
0,8538 ich vordere ez im zuo
0,8539 ich wile daz er mir dâr umbe rehte getuo .”
0,8540 der vile heilige bâbes
0,8541 antwurte ir des .
0,8542 er sprach “vrouwe dîn sun ist dir niht genomen .
0,8543 er ist allerêrest volkomen
0,8544 daz er erkennet daz wâre licht .
0,8545 ich en lougenen dir sîn niht .
0,8546 iz was mîn wille .
0,8547 und hân noch grôzen gedinge .
0,8548 daz dir alsam geschehe .
0,8549 entvâch des heiligen geistes gebe .
0,8550 geloube an den heiligen Krist .
0,8551 der durch dich gemartert ist .
0,8552 wirst dû durch sînen willen in der toufe naz .
0,8553 ze wâre sagen ich dir daz .
0,8554 er lônnet dir mit sînem rîche .
0,8555 dâ wonest dû êwiclîche .
0,8556 besitzest sôgetâne wünne .
0,8557 di der mennischen zunge .
0,8558 niemer mac gekünden
0,8559 und hinne vûre . niemer zergât .
0,8560 vrouwe vernim mîn rât .
0,8561 geloube an den wâren got .
0,8562 der dich von nihte hât gebiledet .
0,8563 silberîne gote und guldîn .
0,8564 waz megen dir di vrum sîn
0,8565 daz sint allez unreine geiste .
0,8566 swer den volget allermeiste .
0,8567 und sich zuo in gesellet .
0,8568 dem lônent si mit der helle .
0,8569 diu iemer mêr wellet .

0,8570 êre dû dînen schepfære .”
0,8571 diu kûningîn hiez ire wîse redenære
0,8572 antwürten dem heiligen manne .
0,8573 dô huop sich der sent an .
0,8574 vile schiere si zwelive ûz erwelten .
0,8575 di allerbezziste gelêrten .
0,8576 di under juden . und under heidenen wâren .
0,8577 des si in alle jâhen
0,8578 di den wâren gotes holden
0,8579 überwinden soleten
0,8580 ein gelübede wart dâ getân .
0,8581 ze dem sende ne koeme nehein man
0,8582 der dechein wort getorste gereden
0,8583 er ne wolte den hals ze wandel geben .
0,8584 wane zwêne philosophi
0,8585 di – lobeten si in iewederen teile dâ bî .
0,8586 der eine hiez Crâthôn der ander Zenophilus .
0,8587 daz buoch nennet uns di hêrren sus .
0,8588 di des sendes rihtære wâren .
0,8589 und aller ire zûhte pflâgen .
0,8590 di ouch di rede beidenthalp unterschieden .
0,8591 di durch leide noch durch liebe
0,8592 nihtes dâ jâhen .
0,8593 wan alse si gehôrten unde gesæhen .
0,8594 swenne daz geschach .
0,8595 daz der man missesprach .
0,8596 daz der wart überwunden .
0,8597 daz rihten si an den stunten .
0,8598 nâch rehter urteile .
0,8599 und jâhen des gemeine .
0,8600 daz er hoerære niene solete haben
0,8601 sô hiezen in di rihtære ûz dem sende gân .
0,8602 ûf stuont der archisinagôgus .
0,8603 di rede erhuop er alsus
0,8604 der hêrre hiez Abiathar .
0,8605 er sprach “Silvester ist diu rede wâr .
0,8606 nû sich wie dâ geschriben stê .
0,8607 nû lisest dû doch selbe in der ê .
0,8608 daz got ûzer sîn selbes munde
0,8609 dem hêrren Moisi kunte .
0,8610 Israhêl habe mich mit êren .
0,8611 ich bin ein got . und ein hêrre .
0,8612 ich bin ein wârer got .
0,8613 und ervüllest dû mîn gebot .
0,8614 dâr umbe gibe ich dir mîn rîche .
0,8615 daz widerredest dû hier wærlîche .
0,8616 und wile dû drî gote haben
0,8617 swer dir der rede wile gestân .

0,8618 der zerbrichet di ê . und gotesgebot .
0,8619 der ist êwiclîchen tô .
0,8620 sô dû selbe maht lesen .
0,8621 er ne sol ze jungeste mit gote niht genesen .”
0,8622 ûf stuont der bâbes rîche .
0,8623 vile harte gezogenlîche .
0,8624 mit schoenem antlütze .
0,8625 der kristenheit was er wole nütze .
0,8626 er sprach . dû bist ein wole gelêrter man .
0,8627 wâr umbe ne wile dû diu buoch dâ niht rehte verstân .
0,8628 dô iu juden diu wâre goteshant .
0,8629 erlôste ûzer Egiptelant .
0,8630 von schalclîchen vorhten
0,8631 vile manige wunder er durch iuch dâ worhte
0,8632 er gap iu al des iu durft . was .
0,8633 daz iu nihtes en gebrast .
0,8634 dâr über guzzet ir boesiu getroc .
0,8635 und betetet an diu apgot
0,8636 gelîch einem stîre .
0,8637 dô vergâzet ir mînes trehtînes schiere .
0,8638 alle die in der werlte dô lebeten .
0,8639 juden und heidene an diu apgot beteten .
0,8640 daz zurnte got sêre .
0,8641 unze Moises der heilige hêre .
0,8642 vile inniclîche sîn gebet
0,8643 hin ze gote tet .
0,8644 daz er den zorn dâr . umbe verlieze .
0,8645 want er di ê von im entvieng .
0,8646 durch di micheln nô .
0,8647 sô warnete si der waltente got .
0,8648 di ungeloubigen diet .
0,8649 wande si im doch dâ vore wâren liep .
0,8650 durch daz sprach er “Israhêl . habe mich mit êren .
0,8651 ich bin ein got und ein hêre .
0,8652 ich bin ein wârer got eine .
0,8653 der name ist underscheiden .
0,8654 er heizet vater . und heizet sun . und der heilige geist .
0,8655 durch unser broede nam er bein und vleisch .
0,8656 di drî namen daz ist ein wârer got .
0,8657 swer daz niene geloubet
0,8658 einen got mit den drîn namen .
0,8659 der ist iemer mit dem tiuvel in der helle begraben .”
0,8660 dô sprach Abiathar .
0,8661 “Silvester . ich sage dir vûre wâr .
0,8662 wir hêten under uns hêren .
0,8663 di grôzes wîstuomes pflâgen .
0,8664 von gote si den gewalt hêten .
0,8665 daz si ûf quikten di tôten

0,8666 daz himelviur verbrante .
0,8667 ire vîande
0,8668 gebuten si an des meres grunt
0,8669 daz wart an der stunt
0,8670 gebuten si in di hoehe der himele .
0,8671 dâ ne was niht widere .
0,8672 den sunnen hiezen si schînen .
0,8673 siben und vierzic wîle .
0,8674 daz er nie von der stete kom .
0,8675 daz ist aber unvernomen
0,8676 daz iz ie von decheinem kristen geschæhe .
0,8677 daz en mac nieman bewæren .”
0,8678 dô sprach der heilige man .
0,8679 “ich wile dir wærlîche sagen .
0,8680 iuwer vürste hiez Jâîrus
0,8681 und was der juden archisinagogus .
0,8682 alse dû hiute bist .
0,8683 sô man singet und liset .
0,8684 sîn tochter hiez unser hêrre . von dem tôde ûf stên .
0,8685 mitten in der stat ze Jerusalêm .
0,8686 ire vater er si wider gap .
0,8687 diu lebete sît manic jâr und tac .”
0,8688 dô sprach der êbrêische man .
0,8689 “Silvester . dû wile mir ein spel sagen .
0,8690 sam der einen troum hât gesehen .
0,8691 maht dû von den buochen reden .”
0,8692 dô sprach der heilige man
0,8693 “nû heiz daz buoch her vüre tragen .
0,8694 den tiuren Josephum
0,8695 iuweren istoriographum
0,8696 ne zeige ich dir iz niht geschriben stân .
0,8697 lâ mich den lîp verworht hân .”
0,8698 diu kûningîn mit grimme .
0,8699 hiez daz buoch vüre bringen
0,8700 alse man . daz buoch ûf tete
0,8701 dô bewærte er ez sâr ze stete
0,8702 daz was der kûninginne leit .
0,8703 sich vrôuwet aber diu kristenheit .
0,8704 dô sprach der bâbes hêre .
0,8705 “Abiathar nû vernim ouch mêre .
0,8706 unser hêrre vuor ze Nâîm .
0,8707 sîn jungeren volgeten im .
0,8708 ein tôten . vuorte man im engegene .
0,8709 mit michelre menige .
0,8710 durch der muoter jâmer .
0,8711 dâ zeigete er sîne genâde .
0,8712 under der porte .
0,8713 der muoter er in lebentigen wider antwurte .”

0,8714 mit den buochen bewærete er in daz .
0,8715 daz diu rede wâr was .
0,8716 dritten stunt zeigete er im geschriben dâ .
0,8717 “Lazarum von Bethania
0,8718 hiez unser hêrre . von dem tôde ûf stên .
0,8719 vore der burc ze Jerusalêm .
0,8720 der an dem vierden tage . begraben lac .
0,8721 daz urkündet Jerusalêm alliu diu stat .
0,8722 ouch zeige ich dir geschriben daz .
0,8723 iuwer bischolv Kaiphas .
0,8724 daz er ze einen stunten .
0,8725 mit dem geiste wart entzündet .
0,8726 swie er ze gote nehein willen habete .
0,8727 iedoch er von im wîssagete .
0,8728 er sprach” iz ist bezzer daz einer ersterbe .
0,8729 denne diu werlt alliu erwerde .
0,8730 dô sprach der êbrêische man .
0,8731 “hieze er di tôten ûf stân .
0,8732 dâ mit bezeichente er daz .
0,8733 daz er guot arzât was .
0,8734 dâr umbe ne sol man in niht haben .
0,8735 neweder ze gote noch ze wâren wîssagen .
0,8736 wir hân ein got in Israhêl .
0,8737 ich en wile nehein anderen mêr
0,8738 woltes dû von dem gote reden
0,8739 sô mahte ich dir antwûrte geben .”
0,8740 dô sprach der heilige man .
0,8741 “wile dû von einem wâren gote rede hân
0,8742 ich en genante dir nehein got mêre .
0,8743 wan den ûz Israhêle .
0,8744 der mit sînem gewelte daz gebôt .
0,8745 daz der küninc Saul lac tôt .
0,8746 und sîn sun Jonathas wart erslagen .
0,8747 den wile ich ze einem hêrren und ze gote haben .
0,8748 ist diu rede wâr .”
0,8749 “der ne lougenen ich niht” sprach Abiathar .
0,8750 “sô hâs dû ouch wole vernomen
0,8751 umbe Dâthân . und Abyron .
0,8752 di kômen wider got dar .
0,8753 mit einer micheln schar .
0,8754 ûf tet diu erde ire munt .
0,8755 und verswalch si an der stunt .
0,8756 ist diu rede wâr .”
0,8757 “der ne lougen ich niht” sprach Abiathar .
0,8758 “nû sich wie dâ geschriben stêt .
0,8759 iuwer vürste Kôrêp .
0,8760 wie schantlîche er den ende genam .
0,8761 mit im manic tûsent manne .”

0,8762 dô sprach der hêbrêisch man .
0,8763 “nû wile dû zwêne gote hân .
0,8764 einen der under uns gebôt .
0,8765 daz der küninc Saul lac tôt .
0,8766 der ander der under den kristenen ze Jerusalêm
0,8767 iuweren tôten dâ hiez ûf stên .
0,8768 nû sich wie der rede sî
0,8769 hiute wâren der gote drî .
0,8770 nû sich wie wir der rede ze ende komen .”
0,8771 dô sprach der rihtære Crâtôn
0,8772 “Silvester nennet nehein got mêre .
0,8773 wan einen ûz Israhêl .
0,8774 er hât dich von rehte überwunden .”
0,8775 an den selben stunten
0,8776 muose Abiathar entwîchen .
0,8777 dô vröuwete sich Constantinus der rîche .
0,8778 ûf stuont dô Jonas .
0,8779 want er erzebischof was .
0,8780 er sprach . “Silvester wir hân ûz dînem munde vernomen .
0,8781 daz ein got von himele sî komen .
0,8782 und an der erde gemartert würde .
0,8783 und als ein ander mennische erstürbe .
0,8784 und sî doch dâ ze himele wârer got .
0,8785 nû sage mir . wie dolete der sun den – tôt .
0,8786 dâ der vater noch der heilige geist . niht mite was .
0,8787 ze wâre sagen ich dir daz .
0,8788 wâren si ze himele ebengelîch und ebenhêre .
0,8789 sô ne mahte daz niemer werden .
0,8790 daz sich diu goteheit schiede .”
0,8791 di rede zerlôste er im schiere .
0,8792 sancte Silvester der heilige bâbes .
0,8793 schiere antwurte er im des .
0,8794 “ist daz dû di wîssagen gelesen hât .
0,8795 sô wundert mich daz dû niene verstâst .
0,8796 durch wiegetâne broede .
0,8797 mennische in di nôt koeme .
0,8798 got vater himeles . und erde .
0,8799 der geschuof im selben ze lobe und ze êren .
0,8800 di engel mit michele kraft .
0,8801 daz si in loben naht und tac .
0,8802 der hêrst engel der under in was .
0,8803 sîn name hiez lichtvaz .
0,8804 durch sîn übermuot muose er vallen .
0,8805 unde di sîne alle .
0,8806 di der übermüete wâren gesellen .
0,8807 di bûwent mit im di hellen .
0,8808 mit michelem grimme
0,8809 von broede verluren di engel di wünne .

0,8810 hât ir juden geschriben daz .”
0,8811 dô sprach Jonas .
0,8812 “der rede ne wellen wir niht lougen
0,8813 von der schrifte müezen wir si gelouben .”
0,8814 dô sprach der bâbes hêre .
0,8815 “sô vernim ouch mêre .
0,8816 mit sînen ebengeraden râte .
0,8817 dô geschuof er nâch sîner hantgetât .
0,8818 den mennische nâch sîn selbes bilede .
0,8819 dô was der engel worden wilde
0,8820 durch den nît .
0,8821 sô huop er ûf den mennische ein strît .
0,8822 daz er sînen stuol solete besitzen .
0,8823 und er diu hellewîze .
0,8824 solte bûwen iemer mêre .
0,8825 daz rou in vile sêre .
0,8826 mit listen er den man . verriet
0,8827 daz er gotes gebot übergie .
0,8828 daz er gote wart ungehôrsam
0,8829 dô muose ouch der mennische ze der helle varn .
0,8830 und al sîn künne iemer mêr .
0,8831 daz erbarmete von himele unseren hêren .
0,8832 kanst dû mir nû gesagen .
0,8833 wâ lôste got wider den man .”
0,8834 dô erzurnte Jonas .
0,8835 er sprach “Silvester wâr umbe tuost dû daz .
0,8836 wænest dû daz sich dirre sent gesamenet habe .
0,8837 daz man in genesim vore sage .
0,8838 dû ne kanst mir selbe noch niht gesagen
0,8839 wâr umbe dû di lange rede hâst erhaben .”
0,8840 dô sprach der bâbes hêre .
0,8841 “nû wile ich dich iz lêren
0,8842 want dû mir ez niene kanst gesagen .
0,8843 nû maht dû der rede wole hier ze mir ende haben .
0,8844 der engel noch der mennische .
0,8845 ne mahte uns gewisse .
0,8846 von der broeden natûre wesen vrum
0,8847 dô sande uns got sînen sun .
0,8848 di mennischheit an dirre erde er genam .
0,8849 mit marter er den mennischen wider gewan .
0,8850 und brâhte in hin widere
0,8851 ze sînem êreren gesidele .
0,8852 unser hêre der heilant .
0,8853 nam wider in sînen gotelîchen gewalt .
0,8854 dem vater . und dem heiligen geiste ebenhêre . und ebenrîche .
0,8855 dannen sint di drî namen . wærlîche .
0,8856 ein got genennet .
0,8857 swer der dinge di wârheit erkennet .

0,8858 und rehten gelouben hât .
0,8859 der besitzet di wünne diu niemer zergât .”
0,8860 dô sprach Jonas .
0,8861 “sô lanc sô er got was .
0,8862 mit einem worte mahte er den man .
0,8863 von der helle wider gewunnen hân .
0,8864 was daz sîn wille .
0,8865 daz er sich lie bescheren und bevillen .
0,8866 und binden sîne hende .
0,8867 rehte sam ein diep schenten
0,8868 ze jungeste an dem galgen töuwen .
0,8869 wer solte an dînen got gelouben .
0,8870 ode wer solte sîn ze gote jehen .
0,8871 disiu rede ne solte nie sîn erhaben .”
0,8872 dô sprach sancte Silvester der heilige man .
0,8873 “daz urkünde ich ûf di wîssagen .
0,8874 wæren dir diu buoch kunt .
0,8875 dâ bewarte ich mîn rede hier zestunt .
0,8876 und wile des ûf dîne wîssagen jehen .
0,8877 nû sprich ob dû di wellest widerreden .”
0,8878 dô sprach der êbrêische man .
0,8879 “vindest dû daz in decheinem wîssagen .
0,8880 der uns ie gesagete an der erde .
0,8881 daz got solte ersterben
0,8882 und vindest dû ez geschriben dâr inne .
0,8883 sô muoz ich dir von rehte entrinnen .”
0,8884 sancte Silvester . der heilige man .
0,8885 hiez Jeremiam dâ vüre tragen
0,8886 an der selben stete .
0,8887 dâ man daz buoch ûf tete .
0,8888 dâ zeigete er in geschriben gewis .
0,8889 sicut ouis
0,8890 at occisioen ducetur .
0,8891 er hiez ez in allen tragen vüre .
0,8892 vile bescheidenlîche .
0,8893 sprach er zuo in allen gelîche .
0,8894 von zungen ze zungen
0,8895 hiez er disiu wort künden .
0,8896 “der uns allen verlihet daz leben
0,8897 der wirdet ze dem tôde gegeben
0,8898 als ein ungemeiletez lembelîn
0,8899 iz en tuot niht ûf den munt sîn .”
0,8900 dô si der wârheite gejàhen .
0,8901 und iz an den buochen sâhen .
0,8902 daz er was überwunden .
0,8903 an den stunten .
0,8904 hiezen in di rihtære ûz gân .
0,8905 dô vröuwete sich manic kristenman .

0,8906 ûf stuont dô Godôlîas .
0,8907 want er ein edel vürste was /
0,8908 er sprach ze den hêren .
0,8909 “Silvester wile dû daz lêren
0,8910 daz ein vrouwe maget wære .
0,8911 und iedoch kint gebære
0,8912 und den selben man .
0,8913 sulen wir ze gote hân .
0,8914 daz urkündest dû ûf di wîssagen
0,8915 der rede wile ich gerne ein ende hân .”
0,8916 dô sprach der bâbes hêre .
0,8917 “nû vernim dû rehte mîn lêre .
0,8918 und antwûrte dû mir denne .
0,8919 alse dir got selbe verhenge .
0,8920 unser hêre der heilant .
0,8921 wart uns von sînem vater ze trôste gesant .
0,8922 von himel ist er an dise erde komen .
0,8923 von einer megede wart er geboren .
0,8924 magetlîche si des kindes genas .
0,8925 maget nâch der gebûrte . was .
0,8926 unde iemer êwiclîches maget ist .
0,8927 und ire sun der heilige Krist .
0,8928 hât uns mit sîner marter geheilet .
0,8929 nû birn wir gesegenet und gereinet .
0,8930 von dem alten Adâmes valle .
0,8931 geladet birn wir alle .
0,8932 ze dem êwigen lebene .
0,8933 nû rede dû dâr engegene .
0,8934 ob dû ez widern wellest
0,8935 ode sprich swaz dû nû kunnest .”
0,8936 Godôlîas huop ûf sîne hant .
0,8937 er sprach “vernemet ir sentherren alle samt .
0,8938 Silvester sprichet er welle bewæren .
0,8939 daz ein maget kint gebære .
0,8940 und den diu maget habe getragen .
0,8941 den sulen wir ze gote haben .
0,8942 er sî erloesære .
0,8943 nû vernemet waz ich hiute bewære
0,8944 getruoc in ie maget oder wîp .
0,8945 dô ne hête er dâ vore nehein zît .
0,8946 dâ muose er aneenge haben .
0,8947 sîn ende kan ich iu an dem galgen wole gesagen .
0,8948 nû sprechet . ir gelêrten alle .
0,8949 wie iu der got gevalle .”
0,8950 der bâbes antwurte im mit wizzene
0,8951 disiu rede wirdet noch hiute vile wole nütze .
0,8952 wir sulen ir gerne ein ende haben .
0,8953 ich erziuge ez mit dînen wîssagen

0,16376 dô der küninc Kuonrât verschiet .
0,16377 ein sun er verliez .
0,16378 daz was der guote Heinrîch .
0,16379 di vürsten dûhte billich
0,16380 daz si den hêrren næmen
0,16381 ze eineme rihtære .
0,16382 zuo ire grôzem unheile
0,16383 di übelen Bêheime .
0,16384 mit helfe der Unger .
0,16385 si sazten sich wider dem küninge .
0,16386 alse der küninc Stephan .
0,16387 dâ ze Wîzeburc wart begraben .
0,16388 Pêter daz rîche nâch im besaz .
0,16389 di vürsten zurnten daz
0,16390 ich weiz si nie beliben .
0,16391 unze si Pêtern von dem rîche vertriben .
0,16392 einen anderen sazten si dô .
0,16393 der hiez der schilhende Otto .
0,16394 mit helfe der Bêheime
0,16395 iz wart in allen ze leide .
0,16396 Pêter vlôch ze dem marcgrâven Albern .
0,16397 dô suochten in di Unger mit her .
0,16398 durch di marke si dô vuoren
0,16399 sîne liute si im sluogen .
0,16400 Pêter und Alber .
0,16401 di ne mahten sich ir niht erwern .
0,16402 si vluchen ze dem guoten Heinrîche .
0,16403 der entvieng si genædicliche .
0,16404 sô iz wole gezam den hêrren .
0,16405 er half in sît wole wider zuo ire êren .
0,16406 der küninc klagete dem rîche .
0,16407 si redeten alle gemeinliche .
0,16408 iz solte den Bêheimen
0,16409 allrêrest werden ze leide
0,16410 dâr nâch den Ungeren .
0,16411 jâ rieten si dem küninge .
0,16412 er hiez di lantliute .
0,16413 den walt nider riuten .
0,16414 vile schiere was daz getân
0,16415 dô ilte man vüre man .
0,16416 di hêrren landes grâven .
0,16417 di dâr allez mite wâren .
0,16418 si hiewen eine wîte .
0,16419 dô getorsten niht gebiten .
0,16420 di Bêheime in ire lande .
0,16421 mit viure man dô brante .
0,16422 Wiscerat und Brâge .
0,16423 man houbetete di sûpâne .

0,16424 der herzoge vile kûme entran .
0,16425 des küniges hulde er sît gewan .
0,16426 ze Regensburc in der stat .
0,16427 michelen schatz er den vürsten dâr umbe gap .
0,16428 Pêter klagete dô tegelîche .
0,16429 dem künige Heinrîche .
0,16430 sîn vile grôz ungemach .
0,16431 der küninc ze Wiene einen hov sprach .
0,16432 di hervart si dâ swuoren
0,16433 ze Ungerem . si dô vuoren
0,16434 der küninc vuorte manigen helt guot .
0,16435 dô besaz . er Bresburc .
0,16436 vile schiere was dô daz ergangen .
0,16437 di burgære wurden gefangen .
0,16438 Otto huop sich enzît .
0,16439 er nam kint und wîp .
0,16440 ze den Riuzen er entran .
0,16441 sîn geslehte wart allez erslagen .
0,16442 Pêter an sînen stuol saz
0,16443 der küninc Heinrîch niene vergaz .
0,16444 des dienestes des im Alber hête getân .
0,16445 Leopolden er dô nam .
0,16446 der was Alberem sun .
0,16447 wie mahte er baz wider in getuon .
0,16448 sîner marke er selbe pfîlac .
0,16449 unz er im daz swert gap .
0,16450 er lêch im sîniu lêhen .
0,16451 vürsten di hêren .
0,16452 di lobeten alle sîne gûete .
0,16453 si sprâchen er hête ein küninlich gemüete .
0,16454 under diu kom ez sô .
0,16455 Rômære striten dô .
0,16456 di hêten drî bâbese erhaben .
0,16457 daz en mahte diu kristenheit niht vertragen
0,16458 daz grôz unbilde .
0,16459 daz klageten si dem künige .
0,16460 ze Babenberc was ein bischolv .
0,16461 der emzigete dicke des küniges hov .
0,16462 geheizen was er Swîdegêr .
0,16463 ein wole gelêrte meister .
0,16464 der geriet dem künige Heinrîche .
0,16465 er gebüte vridelîche .
0,16466 einen sent hin ze Rôme
0,16467 und rihte dâ schône .
0,16468 nâch sentlîchen êren .
0,16469 des râtes volgeten dô alle di hêren .
0,16470 der küninc den bischolv mit im nam .
0,16471 und ander di im dâ zuo gezam .

0,16472 hin ze Rôme er dô reit .
0,16473 sumelîchen was iz dâ leit .
0,16474 sumelîche vröuweten sich aber des .
0,16475 dar vuor ouch diu künigîn Agnes .
0,16476 der küninc ze Rôme an daz gerihte gesaz
0,16477 driu hundert bischolve dâ was .
0,16478 viere und sechzic mêre
0,16479 dâ huop sich michel goteslêre .
0,16480 mit urteile der genôze .
0,16481 di drî bâbese wurden verstôzen
0,16482 Swîdegêr den stuol besaz .
0,16483 der êr bischolv ze Babenberc was .
0,16484 dâ mit schieden si die strîte .
0,16485 ze keiser er in dô wîhte .
0,16486 den segen entvieng ouch diu keiserîn .
0,16487 si lobeten alle mîn trehtîn .
0,16488 under diu kom daz .
0,16489 dô der keiser ze Rôme was .
0,16490 dem künige von Ungerem . missegie .
0,16491 an dem stuole man in vieng .
0,16492 diu ougen si im ûz stiezen .
0,16493 in dem lande si nieman liezen .
0,16494 er ne hête den lîp verloren .
0,16495 swer von diutischem lande dar kom .
0,16496 dô ne was des nehein rât .
0,16497 der keiser gebôt dar di hervart .
0,16498 daz rîche dâ ze Ungerem teilte er dô enzwei .
0,16499 dem geschenden gap er ein teil
0,16500 dem blinden daz ander .
0,16501 iedoch si einander branten .
0,16502 des half in der Beier herzoge Kuonrât .
0,16503 der sît dâr umbe vertriben wart .
0,16504 ûzer roemischem rîche .
0,16505 dâ ze Ungerem starp er schantlîche
0,16506 ze Regenesburc was dô ein bischolv .
0,16507 von dem sagete man ie noch .
0,16508 geheizen was er Gebehart .
0,16509 dô kom von des tiuvels râte .
0,16510 daz er wart gevangen .
0,16511 von sînen heimelîchen mannen .
0,16512 in den karkære geworfen .
0,16513 der keiser muose im selbe dannen helfen .
0,16514 von der grôzen schalcheit .
0,16515 di vürsten klageten alle daz leit .
0,16516 want er des keisers veter was .
0,16517 sînen stuol er ze Regenesburc aber wider besaz .
0,16518 Liutezære dô wider ûz vuoren .
0,16519 der kristene si vile ersluogen .

0,16520 sumelîche si ertrankten .
0,16521 daz lant si dô branten .
0,16522 der keiser vore leide siechen began .
0,16523 swem er dâ vore iht ze leide hête getân .
0,16524 dâ man sîn in ermanete .
0,16525 wie schiere er di besande .
0,16526 er hiez gelten und geben .
0,16527 in gote verwandelte er daz leben .
0,16528 daz rîche hête er vûre wâr .
0,16529 rehte sibenzehen jâr .
0,16530 und ahte tage mêre .
0,16531 mîn trehtîn hât di sêle .
0,16532 die vûrsten rieten dô gemeinlîche .
0,16533 ûf einen Heinrîchen
0,16534 der was des oberen sun .
0,16535 durch den michelen roum .
0,16536 den der vater hête gewunnen .
0,16537 sô gonden si iz dem jungen .
0,16538 sîn muoter wart herzogîn ze Beieren .
0,16539 di Sahsen ne mahten dô niht geweigeren
0,16540 si ne wurden dem jungen künige undertân .
0,16541 si wurden im sît harte sorcsam .
0,16542 durch des küniges bete .
0,16543 di Sahsen huoben sich an der stete .
0,16544 di Liutezære si twungen .
0,16545 di kristene si wider gewunnen
0,16546 si nâmen in alle ire kraft .
0,16547 dem künige wurden si zinshaft .
0,16548 dô wuohs der küninc Heinrîch .
0,16549 vile harte versûmete er sich .
0,16550 harte er sich vergâhete .
0,16551 die vûrsten er versmâhte .
0,16552 er bespote ie di edelen .
0,16553 den wîstuom . liez er im entwremden .
0,16554 unkiusche er sich underwant .
0,16555 er reit hövischen in diu lant .
0,16556 er hôte di edelen . vrouwen .
0,16557 di sîne liez er rouben .
0,16558 vrîheit underwant er sich .
0,16559 vile dicke saz er obe spile .
0,16560 sô er solte rihten daz rîche .
0,16561 daz begunde den vûrsten misselîchen .
0,16562 di hêrren begunden sîn dô vâren .
0,16563 dicke setzten si ire lâge .
0,16564 daz man in solte erslahen .
0,16565 dô hête er ein kappellân .
0,16566 der was erzebischolv ze Breme .
0,16567 di vûrsten westen ez harte dem .

0,16568 si sprâchen daz iz allez sîn schult wære .
0,16569 und daz iz dem rîche von im niht gezæme .
0,16570 hin ze Merseburc wart gesprochen ein hov .
0,16571 dâr beredete . sich der erzebischolv .
0,16572 dâr huop sich under den hêren .
0,16573 ein vile michel werre .
0,16574 di Sahsen dem künige geswichen .
0,16575 daz rîche si an griffen
0,16576 si swuoren . sich zesamene .
0,16577 mit allen ire magene
0,16578 der Düringe lant .
0,16579 wart dô gar verheret und verbrant .
0,16580 vürsten di dô wâren .
0,16581 ze Beieren und ze Swâben .
0,16582 ze tale bî dem Rîne .
0,16583 di hêten dô ze nîde .
0,16584 daz di Sahsen sô gewalticliche .
0,16585 vuoren in dem rîche .
0,16586 und daz lant von in was verbrunnen .
0,16587 si gebuten ire samenunge .
0,16588 si suochten si mit her .
0,16589 di Sahsen griffen wole ze were .
0,16590 ein wazzer heizet Unstruot
0,16591 daz verwandelte sich in daz bluot .
0,16592 dâ ne was niuwan . ache und wê
0,16593 rehte sam ein breiter sê .
0,16594 bluotes dâ swebete .
0,16595 der küninc daz wole behabete .
0,16596 di Sahsen wurden erslagen .
0,16597 wan daz ir vile kûme dannen entran .
0,16598 er betwanc allez ire lant .
0,16599 di gîsele gâben si in sîn gewalt .
0,16600 ze Beieren was dô ein herzogîn
0,16601 mîn trehtîn gap ir den sin .
0,16602 si nam ire heimeliche man .
0,16603 si wolte ze dem heiligen grabe varn .
0,16604 ein stat . heizet Bâre .
0,16605 dâ schiffeten sie sich ze wære .
0,16606 alse si kômen an daz urvar .
0,16607 di heiden wurden ir gewar .
0,16608 diu vrouwe wart gefangen
0,16609 mit wîben . und mit mannen .
0,16610 ein stat . heizet Ragêz
0,16611 dâ bestuont . diu herzogîn Agnes .
0,16612 dô nam si ein heidenischer man .
0,16613 bî dem si sît gewan .
0,16614 ein sun der hiez Sangwîn .
0,16615 nû lâzen wir di rede dâ sîn .

0,16616 swenne ez kumet an daz .
0,16617 sô bescheiden wir di rede baz .
0,16618 under diu kom daz zît .
0,16619 daz der herzoge Gotevrit .
0,16620 huop sich ze dem heiligem grabe .
0,16621 er verliez alle sîne habe .
0,16622 dem wâren gote ze êren .
0,16623 vile was der hêrren .
0,16624 di sich mit im ûz huoben .
0,16625 durch Ungerer si dô vuoren .
0,16626 dannen durch Pulgrî .
0,16627 durch di wüesten Rumenîe .
0,16628 der heidene kraft
0,16629 vlôch ze Antioch in di stat .
0,16630 der herzoge dâr vore saz .
0,16631 ein heiden dô dâ inne was .
0,16632 geheizen was er Mîlîân .
0,16633 der ne mahte der state niht hân .
0,16634 daz er sich erlôste .
0,16635 di heiden in dô wole trôsten .
0,16636 si beitten aber ze lange .
0,16637 der vürste wart gevangen .
0,16638 di sîne wurden alle samt erslagen .
0,16639 di burc er in nôt sturmes an gewan .
0,16640 die heiden vereischeten dô daz
0,16641 daz diu burc begriffen was .
0,16642 vûnf heidenische künige .
0,16643 di kômen mit aller ire menige .
0,16644 nû wære iu lanc ze sagenne .
0,16645 mit wie grôzen menige .
0,16646 si di burc besâzen .
0,16647 ire grôz unmâze .
0,16648 sô wir alle hoeren jehen .
0,16649 di ne mahte nieman durchsehen .
0,16650 di burc si umbelâgen .
0,16651 di kristene in grôzen noeten wâren .
0,16652 swie übele ir daz geloubet .
0,16653 man verkoufete eines eseles houbet .
0,16654 umbe drî bîsantinge .
0,16655 der hunger twanc si dâr inne .
0,16656 di heiden di si selbe sluogen .
0,16657 zesamene si si truogen .
0,16658 si âzen di erstunken lîchnamen .
0,16659 dâ mit vrîsten si sich ze wâre .
0,16660 ienoch wolte got di sîne neren .
0,16661 jâ ne half di heiden nehein here .
0,16662 eines morgenes vile vruo .
0,16663 der herzoge wæfente sich dô .

0,16664 dô di kristene ertwelt wâren .
0,16665 von hungeres zâdel .
0,16666 von unmehte si sîgen .
0,16667 vile manige dâ beliben
0,16668 dô kom in ze trôste .
0,16669 der uns von der helle erlôste .
0,16670 di kristene gevrôuwete er .
0,16671 si vuntten daz heilige sper .
0,16672 di recken ellende .
0,16673 rahten ûf ire hende .
0,16674 mit hungerigem lîbe
0,16675 huoben si sich ze wîge .
0,16676 si sluogen in einer lützel stunt .
0,16677 der heidene mêr denne vûnvzic tûsent .
0,16678 des half in selbe mîn trehtîn .
0,16679 solich kraft wart under in .
0,16680 ein kristenman .
0,16681 hête wole tûsent heidene erslagen .
0,16682 wâren si im niht entrunden .
0,16683 lop si dô sungên .
0,16684 ich sage iu wunderlîche dinc .
0,16685 der mut kerne kom umbe einen pfenninc .
0,16686 alsô erlôste got sîne schalke .
0,16687 mit sînem gotelîchem gewelte .
0,16688 alse unser hêrre si ire leides ergatzte .
0,16689 und si Antioch besetzeten
0,16690 dô vuoren si aber vûrebaz
0,16691 Jerusalêm er dô besaz .
0,16692 heidene wâren dâr inne .
0,16693 mit michelem grimme .
0,16694 die heiden ungesezzen
0,16695 wâren alsô vermezzen .
0,16696 di wurfen ûf diu bûrge tor .
0,16697 si vâhten mit in dâ vore .
0,16698 di kristene mit in dâr in drungen .
0,16699 di burc si in an gewonnen .
0,16700 Wîcgêr und Vriderîch .
0,16701 vile wole uobten si sich .
0,16702 swaz in der heidene zuo kom .
0,16703 di muosen alle des tôdes bekoren .
0,16704 sumelîche vluchen ûf di türne
0,16705 ire lîp ze beschirmenne .
0,16706 si boleten und schuzzen .
0,16707 lützel si des genuzzen .
0,16708 daz viur muose dâr über gân .
0,16709 jâ wurden aber erslagen .
0,16710 beidiu kint und wîp .
0,16711 got half den sînen an der zît .

0,16712 der küninc von Babilônie .
0,16713 der sâmete sich mit grôzer menige .
0,16714 er wolte di burc erlediget hân .
0,16715 daz hôrte der herzoge Gotevrit sagen .
0,16716 er samenete sich mit den kristenen
0,16717 er ne wolte ez niht langer vristen .
0,16718 dô sprach der herzoge Gotevrit .
0,16719 “mîn trehtîn . hât ein guoten site .
0,16720 daz er di sîne niemer verlât .
0,16721 swer im ze der noete gestât .
0,16722 wir sulen den wec mit im teilen .
0,16723 sô megen uns di veigen
0,16724 niemer entrinnen .”
0,16725 di kristene begunden di rede alle minnen .
0,16726 ein wazzer heizet Salkathâ .
0,16727 di heiden lâgen dâ .
0,16728 mit sôgetâner kraft .
0,16729 daz iu daz nieman gesagen ne mac .
0,16730 di kristene ne mahten wazzers niht hân .
0,16731 vile tiure begunden si daz gote klagen .
0,16732 daz liut was erswitzt .
0,16733 von der sunnen erhitzt .
0,16734 si hêten michel ungemach .
0,16735 ein michel zeichen dâ geschach .
0,16736 di lufte sie beswebeten .
0,16737 daz si nehein nôt habeten .
0,16738 si trunken ab dem himeltouwe .
0,16739 wer solte gote missetrûwen .
0,16740 alse di heiden vernâmen .
0,16741 daz di kristene begunden nâhen
0,16742 ze vlûhte huoben si sich .
0,16743 âne slac und stich .
0,16744 lac ir zehenzic tûsent tôt .
0,16745 vore durstes nôt .
0,16746 sumelîche sich ertranken .
0,16747 sumelîche sich in daz mer sankten .
0,16748 sumelîche burgen sich under den dornen .
0,16749 di kristene dâ vorne .
0,16750 nâmen sôgetânen roup .
0,16751 daz diu rede ne touc .
0,16752 niemanne ze sagenne .
0,16753 di kristene suochten ze Babilônie .
0,16754 vaste unz an daz bürge tor .
0,16755 di heiden dâ vore .
0,16756 wurden ertret und erslagen .
0,16757 daz man iu vüre wâr wole mac sagen .
0,16758 daz der heidene lant .
0,16759 von dem âse erstanc .

0,16760 diu vröuwede under den kristenen wart .
0,16761 si huoben sich wider in di heiligen stat .
0,16762 nû ne mahten wir iu niemer gesagen besunder .
0,16763 elliu diu wunder .
0,16764 di got tet durch sîne kint .
0,16765 diu vorhte breite sich über allen disen umberinc .
0,16766 dâ got di sîne tete sigehaft .
0,16767 dâ gezwîvelte alliu heidenischiu kraft .
0,16768 si ne versuochten ez an si niht mêre .
0,16769 dô breite sich diu goteslêre .
0,16770 di kristene ein küninc vordereten .
0,16771 gotes dienst si ordeneten .
0,16772 si dienten gote gewisse .
0,16773 mit mettene und mit messe .
0,16774 mit almuosenen und mit gebete .
0,16775 von stete hin ze stete .
0,16776 von lande ze lande .
0,16777 di kristene mit gewelte .
0,16778 ervâhten daz künincrîche .
0,16779 di heiden muosen in entwîchen .
0,16780 daz vrumete allez der herzoge Gotevrit .
0,16781 wâ vereischetet ir êr . oder sît .
0,16782 ie dechein man sô spæhen
0,16783 dem dâr ie sô wole geschæhe .
0,16784 ze allen werltlîchen êren .
0,16785 ze genâden ist sîn sêle
0,16786 alse ich iu nû sage .
0,16787 dâ ze dem heiligem grabe .
0,16788 dâ ruowet . sîn gebeine .
0,16789 diu sêle ist heilic und reine .
0,16790 nû sulen wir wider grîfen
0,16791 ze dem keiser Heinrîche .
0,16792 mit der vürsten willen .
0,16793 ein hervart vuor er ze Pulle .
0,16794 dâ was er manigen tac
0,16795 eines sites er dô pflac .
0,16796 daz er gerne eine .
0,16797 reit sîne birseweide .
0,16798 eines morgenes vruo .
0,16799 sînen vîanden kom er zuo .
0,16800 dâ was er mit sorgen .
0,16801 unz an den vierden morgen
0,16802 di vürsten begunden in alle klagen .
0,16803 si wânten si solten in verloren hân .
0,16804 daz mære in diutisch lant kom .
0,16805 daz der keiser Heinrîch wære verloren .
0,16806 di vürsten sameneten sich ze Bunne .
0,16807 Heinrîchen den jungen .

0,16808 den lobeten si alle gemeinliche .
0,16809 si entvulhen im daz rîche .
0,16810 daz er des gerihtes pflæge .
0,16811 nû der vater verloren wære .
0,16812 dâr nâch in lützelen stunten .
0,16813 der alte küninc wart vunden .
0,16814 er reit ze Rôme in di stat .
0,16815 ze keiser er gewîhet wart .
0,16816 dô kêrte er in diutisch lant widere .
0,16817 als er kom in daz gebirge .
0,16818 dô hôrte er wêrlîche sagen .
0,16819 man solte in erslahen .
0,16820 mit listen er entran .
0,16821 mit vile unmanigen mannen .
0,16822 ze Regenesburc der houbetstat .
0,16823 ein grimmiger hov gesprochen wart .
0,16824 dar kom der alte
0,16825 mit michelem gewelte .
0,16826 dem hulfen dô gemeine .
0,16827 Sahsen und Bêheime .
0,16828 und ander di im dô willic wâren .
0,16829 Beier und Swâbe .
0,16830 di hulfen dem jungen .
0,16831 unde . alle di in lobeten ze Bunne .
0,16832 ein wazzer heizet der Regen .
0,16833 der rinnet dâ eneben .
0,16834 dâ kômen si einander enegene .
0,16835 mit vile grôzer menige .
0,16836 Beier und Swâbe .
0,16837 di hulfen dô ze wære
0,16838 Heinrîch dem jungen .
0,16839 di Bêheime vile kûme entrunnen .
0,16840 Hertwîc wart erslagen .
0,16841 der alte ne mahte in niht vore gehabt .
0,16842 dannen muose er entwîchen .
0,16843 er wonete an dem rîche .
0,16844 daz saget daz buoch vûre wâr .
0,16845 ehte vierzic jâr .
0,16846 an dem niunden er verstôzen wart .
0,16847 dâ ze Spîre beleip er in der stat .
0,16848 di bischolve sich dô besanden .
0,16849 von lande ze lande .
0,16850 si hazzeten daz unbilede .
0,16851 si ne wolten dem jungen künige .
0,16852 nie werden undertân .
0,16853 jâ vlouc des bâbeses ban .
0,16854 allenthalben in di kristenheit .
0,16855 iedoch was iz den vürsten leit .

0,16856 di in dâ vore lobeten
0,16857 ze rihtære . und ze vogete .
0,16858 di ne wolten ouch niht entwîchen .
0,16859 dem jungen Heinrîch .
0,16860 daz rîche begunde sich dô teilen .
0,16861 di pfaffen und di leien .
0,16862 di leien hulfen dô mit vlîze .
0,16863 dem jungen Heinrîche .
0,16864 ein hov lobeten si dô ze Regenesburc .
0,16865 dar kom vile manic helt guot .
0,16866 bischolve dâ niene wâren .
0,16867 dar kômen aber herzogen . und grâven .
0,16868 der grâve Sigehart .
0,16869 in der stat erslagen wart .
0,16870 di vürsten allgemeinliche
0,16871 rieten dem künige Heinrîche .
0,16872 er vüer hin ze Rôme
0,16873 ze stætenne sîne krône .
0,16874 ein erzebischof hiez Albreht .
0,16875 iz wære krump oder sleht .
0,16876 er half dem künige mit vlîze .
0,16877 der bâbes begunde im daz wîzen .
0,16878 und alle heithaften hêrren .
0,16879 der erzebischof huop einen michelen werren .
0,16880 er geriet dem künige .
0,16881 daz wande man im übele .
0,16882 daz di sîne in daz münster giengen .
0,16883 den bâbes si dâ viengen .
0,16884 si vuorten in gefangen .
0,16885 samet in dannen .
0,16886 dô wolten Rômære .
0,16887 ledigen ire hêrren .
0,16888 si wæfenten sich mit vlîze .
0,16889 in halsberge . wîze .
0,16890 si îlten über Tiber .
0,16891 jâ gelac ir âne zwîvel .
0,16892 mêr denne siben tûsent man .
0,16893 beide wunt . und erslagen .
0,16894 den bâbes vuorten si dâ under in .
0,16895 der küninc wolte gerne . ûz sîn .
0,16896 Rômære in ne liezen .
0,16897 di mûre si nider stiezen .
0,16898 diu bürge tor wâren enge .
0,16899 di diutischen . ne wolten niht in daz gedreng .
0,16900 ire wege si dô wîtten .
0,16901 daz si wole mahten rîten .
0,16902 al nâch ire willen .
0,16903 des half in ire grôz ellen .

0,16904 der küninc reit dô in dem lande .
0,16905 mit roube und mit brande .
0,16906 di bürge er in an gewan .
0,16907 er vienc in di man .
0,16908 er tet in grôziu herzeleit .
0,16909 der bâbes hête selbe arbeit .
0,16910 er tet im michel ungenâde .
0,16911 di wîsen di dô dâ wâren .
0,16912 di gerieten in beiden .
0,16913 daz iz alsus wart gescheiden .
0,16914 daz der küninc diu bischtuom elliu ûf gap .
0,16915 der bâbes ladete in dô ze Rôme . wider in di stat .
0,16916 dô entviengen in Rômære .
0,16917 mit vile grôzen êren .
0,16918 und alle sîne mitereisen .
0,16919 der bâbes wîhete in dô ze keiser .
0,16920 er entsluoc im den ban .
0,16921 vrô schiet der keiser danne .
0,16922 die brieve vlugen in daz lant .
0,16923 der keiser hiez roup und brant .
0,16924 allenthalben gelten .
0,16925 dô begunde man harte schelten .
0,16926 der Megenzære hêre .
0,16927 si sprâchen daz er solichen werren
0,16928 in dem rîche hête erhaben .
0,16929 diu kristenheit hête sîn iemer mêr schaden .
0,16930 dem keiser muosen dô entwîchen .
0,16931 di vürsten in dem rîche .
0,16932 di êr wider im wâren
0,16933 di suochten sîne genâde .
0,16934 di guoten und di rehten .
0,16935 di westen ez alle dem bischolve Albrehte .
0,16936 daz der sun ie wider im gegreif .
0,16937 daz was geistlîchen hêrren leit .
0,16938 daz rîche hête er vüre wâr .
0,16939 rehte sibenzehen jâr .
0,16940 und sehs mânôde mêre .
0,16941 dâ ze Spîre begruoben si den hêrren .
0,16942 die vürsten lobeten dô ein sprâche .
0,16943 hin ze dem stuole ze Âche .
0,16944 di vürsten kômen dâ zesamene .
0,16945 bischolve manige .
0,16946 si rieten listiglîche .
0,16947 wâ si in dem rîche .
0,16948 dechein vürsten næmen
0,16949 der dem rîche wole gezæme .
0,16950 dô hôrten si dicke wole loben .
0,16951 von Sahsen . ein herzogen

0,16952 den guoten Liutheren .
0,16953 si ladeten in mit grôzen êren .
0,16954 ire boten schuofen si dô dâr zuo .
0,16955 di arbeitten spâte und vruo .
0,16956 dâ ze Brûneswîc . si in dô vuntent .
0,16957 an den selben stuntent .
0,16958 also er daz mære vernam .
0,16959 vile schiere besande er sîne man .
0,16960 er sprach ire rât wolte er haben .
0,16961 ob er ez mit ihte wideren mehte .
0,16962 er sprach daz er ne tohte .
0,16963 ze decheinen grôzen arbeiten mêre .
0,16964 daz widerrieten im di hêrren .
0,16965 jâ sprâchen di hêrren alle .
0,16966 im solte wole gevallen .
0,16967 daz in di vürsten lobeten
0,16968 ze rihtære . und ze vogete .
0,16969 mit râte si in beviengen .
0,16970 daz si in sîn ze jungeste übergiengen .
0,16971 daz er ze Megenzen gereit .
0,16972 daz was zwein gebrüederen leit .
0,16973 der hiez Kuonrât . der ander hiez Vriderîch .
0,16974 vile tiure vermâzen si sich .
0,16975 er ne würde niemer mêre .
0,16976 ire küninc noch ire hêrre .
0,16977 daz was daz ander leit .
0,16978 der herzoge von Bêheim vertreip .
0,16979 Otten von Merhern
0,16980 einen vürsten harte vrevelen .
0,16981 dô vlôch er ze dem künige .
0,16982 den Sahsen geviel iz übele .
0,16983 si sprâchen iz wære wider dem rîche getân .
0,16984 iz solte an alle ire êre gân .
0,16985 di vürsten kômen des eneîn .
0,16986 der küninc suochte hin ze Bêheim .
0,16987 dô was der Bêheime walt .
0,16988 allenthalben verhaget .
0,16989 daz dâr nieman mahte durch komen .
0,16990 er ne hête den lîp dâ ze stete verloren .
0,16991 Otto was ein listiger man .
0,16992 tûsent rîtær er zuo sich nam .
0,16993 si huoben sich ze vuozen .
0,16994 diu ros si hier ûz liezen .
0,16995 sie wolten dâr in sîn geslichen .
0,16996 dô was der snê sô michel .
0,16997 si ne hêten wec noch pfat .
0,16998 di helde wurden harte nôthaft .
0,16999 ire gewæfen si selbe truogen .

0,17000 di helde begunden harte muoden .
0,17001 di Bêheime wurden sîn gewar .
0,17002 vile schiere . gerehten si sich dar .
0,17003 di Sahsen wurden allermeist erslagen .
0,17004 Otto kom ouch niemer mêr danne .
0,17005 eines morgenes dô ez tagete .
0,17006 der herzoge Uolrîch behabete .
0,17007 den küninc und di sîne .
0,17008 di vürsten begunden harte zwîvelen .
0,17009 di wîsen di dô dâ wâren .
0,17010 bischolve . unde . grâven .
0,17011 di gerieten dem herzogen Uolrîche .
0,17012 daz er dem künige solte entwîchen .
0,17013 er wære des rîches hêre .
0,17014 dô gevolgete in der hêre .
0,17015 des küniges hulde er gewan .
0,17016 sît wart er sîn heimelich man .
0,17017 daz er des rîches râtgebe was .
0,17018 vore Nürenberc er mit im saz .
0,17019 Kuonrât . unde . Vriderîch .
0,17020 vile harte vlizeten si sich .
0,17021 zwêne herzogen hêre .
0,17022 waz si mêr und mêre .
0,17023 dem künige ze leide mahten getuon .
0,17024 wole hulfen in dâr zuo
0,17025 vriunde . unde . mâge .
0,17026 di vürsten hulfen dem künige trâge .
0,17027 di herzogen . und ire man .
0,17028 mit ûf gerihtem vane .
0,17029 wuosten si daz rîche .
0,17030 vile harte vrevellîche .
0,17031 der küninc joch diu sælige künigîn .
0,17032 vile dicke pflegeten si mînen trehtîn .
0,17033 beide . wîle . und stunte .
0,17034 maneten si got dâr umbe .
0,17035 durch sîner muoter lîbe .
0,17036 daz er ez genædiclîche schiede .
0,17037 nâch gewarheit der sêle .
0,17038 und ouch nâch des rîches êre .
0,17039 vürsten sumelîche .
0,17040 gerieten dô in dem rîche .
0,17041 si erwelten den herzogen Kuonrâten .
0,17042 si vergâheten sich ein teil ze harte .
0,17043 si hiezen in diu rîche sagen .
0,17044 si wolten Kuonrâten haben
0,17045 ze künige . und ze hêren
0,17046 dâ ze Niuwenburc . huoben si den werren .
0,17047 dâ lobeten si in ze künige .

0,17048 geistlichen hêren geviel daz übele .
0,17049 der strît wonete dô sô lange .
0,17050 unze di bischolve mit banne .
0,17051 ze dem künige griffen .
0,17052 di herzogen in dô entwichen
0,17053 Kuonrât vlôch ze Meilân .
0,17054 des rîches kraft sich dô vûre nam .
0,17055 dô volgete .
0,17056 hin ze den Langbarten .
0,17057 Vriderîch von Valkenstein .
0,17058 der was sîner eitgenôze ein .
0,17059 ein burc heizet Spîre .
0,17060 daz en stuont niht lange wîle .
0,17061 unze si der küninc Liuther besaz .
0,17062 wande si der æhtere houbetstat was .
0,17063 Kuonrât si trôste .
0,17064 daz er di burc lôste .
0,17065 daz en was vrum niht .
0,17066 der küninc Liuther si nie verliez .
0,17067 unze si im di burc ergâben .
0,17068 alle di dâr inne wâren .
0,17069 di swuoren hulde dem rîche .
0,17070 jâ gemêrte got tegelîche .
0,17071 dem künige Liuthere .
0,17072 alle sîne wêrlîch êre .
0,17073 under diu wart ze Rôme ein strît .
0,17074 jâ huoben si wider einander grôzen nît .
0,17075 si sazten zwêne bâbese an den stuol .
0,17076 der küninc Liuther dar mit her vuor .
0,17077 mit râtenne der vürsten gemeine .
0,17078 sô verwurfen si den einen .
0,17079 der dâ Petrilewes hiez .
0,17080 von dem stuole man in stiez .
0,17081 si gevesteneten Innocentîum .
0,17082 wider got ne mac nieman niht getuon .
0,17083 der bâbes wîhete in dô ze keiser .
0,17084 dô gerieten si ein reise
0,17085 in daz lant ze Pulle .
0,17086 daz was der vürsten wille .
0,17087 der vürste hiez dâ . Ruodher
0,17088 den vertreip der küninc Liuther .
0,17089 in Siciliam .
0,17090 dô vuorte des küniges vane .
0,17091 Kuonrât von den Swâben .
0,17092 und alle di im êr widerwertic wâren .
0,17093 di dieneneten im ze wâre .
0,17094 einen turn dâ ze Bâre .
0,17095 den gewan er mit michelen noeten .

0,17096 des half im got der guote .
0,17097 ze Beieren was ein herezoge .
0,17098 der was in grôzen lobe .
0,17099 er was ein vürste alsô hêrsam .
0,17100 vile willic wâren im sîne man .
0,17101 er was des keisers eidem .
0,17102 er was der allertiuresten leien einer .
0,17103 die dâr bî den zîten lebeten .
0,17104 ô wê waz er guoter tugende habete .
0,17105 ein lant heizet Tuskân .
0,17106 di marke er dâ gewan .
0,17107 jâ verdiente er umbe daz rîche .
0,17108 daz im der keiser williclîche .
0,17109 beidiu lêch und gap .
0,17110 des rîchen herzogen kraft .
0,17111 diu schein wole dâ ze Pulle .
0,17112 dâ vrumete er wole sînen willen .
0,17113 daz buoch kûndet uns gewis .
0,17114 ein berc heizet mons Castitatis .
0,17115 ze sancte Benedikten berge .
0,17116 dâ nam er sîne helde .
0,17117 si kêrten . zuo dem berge .
0,17118 si wurden dâ wallære .
0,17119 dâ dienten wole di Abensære .
0,17120 sie sluffen in stehelîne rocke .
0,17121 dâr über legeten si lînîne kappen .
0,17122 diu swert under den uohsen .
0,17123 si giengen barvuoze .
0,17124 guoter sinne si pflegeten .
0,17125 si venjeten und beteten .
0,17126 den berc si ûf slichen .
0,17127 di vîande si begriffen .
0,17128 si zühtigeten si ungemechelîchen .
0,17129 di burc antwurten si dem rîche .
0,17130 der herzoge und sîne man .
0,17131 vrô schieden si dannen .
0,17132 Benevente hiez ein stat .
0,17133 di er mit sînem herschilde ervaht .
0,17134 dô vuor er aber vürebaz .
0,17135 ze wâre sagen ich iu daz .
0,17136 ûf dem Hôuweberge .
0,17137 dâ uobten sich sîne helde .
0,17138 Trôje si dâ gewonnen .
0,17139 mit sturme si dâr in drungen .
0,17140 vile harte vermezzenlîche .
0,17141 des dankete in der keiser rîche .
0,17142 vore der burc ze Bâre .
0,17143 der keiser hiez ze wâre .

0,17144 wûrken ein antwerc .
0,17145 daz was grôz und starc .
0,17146 daz dâ heizet ebenhoehe .
0,17147 iz wart êrlich und schoene .
0,17148 dâr über hiez er dâr in graben
0,17149 di heiden ne mahten der burc niht behaben .
0,17150 daz viur niden ûf brach .
0,17151 jâ habeten grôz ungemach .
0,17152 di dâr ûfe wâren .
0,17153 di hiez der keiser hâhen .
0,17154 mit der vûrsten aller lobe .
0,17155 dô satzte er ein herzogen .
0,17156 den guoten Regenolten .
0,17157 der keiser ne wolte .
0,17158 dannoch niht erwenden .
0,17159 er reit ze Orterende .
0,17160 sînen schaft schôz er in daz mer .
0,17161 jâ rihte der keiser Liuther
0,17162 daz saget daz buoch vûre wâr .
0,17163 rehte zwelif jâr .
0,17164 zwelif wochen und zwelif tage .
0,17165 swer daz liet vernomen habe .
0,17166 der sol ein pater noster singen .
0,17167 dem almehtigen gote ze minnen .
0,17168 des keiseres Liutheres sêle .
0,17169 er was wole . des rîches hêrre .
0,17170 bî im was der vride guot .
0,17171 die erde wole ire wuocher truoc .
0,17172 er minnete alle gotelîche lêre .
0,17173 und behielt ouch wereltlîche êre .
0,17174 er vorhte mîn trehtîn .
0,17175 sam tet diu sælige kûningîn .
0,17176 die armen sie bewætete .
0,17177 die nôtigen sie beriet .
0,17178 di heidenschaft sie betwungen .
0,17179 swaz si an dem rîche gewunnen .
0,17180 daz was gotes êre .
0,17181 nû genâde got ir beider sêle .
0,17182 die vûrsten kômen dô ze râte
0,17183 an einen Kuonrât .
0,17184 der êr wider dem rîche was .
0,17185 der Regenesburgære geriet daz .
0,17186 der bischolv Heinrîch .
0,17187 ein Diezâre alsô hêrlîche .
0,17188 mitsament dem Bêheime
0,17189 daz tâten sie dem herzogen Heinrîch ze leide
0,17190 und sînem bruoder Welfe
0,17191 sie gewunnen grôze helfe

0,17192 durch den alten nît .
0,17193 want sie bî des keiseres Liutheres zît .
0,17194 in grôzen êren wâren .
0,17195 die vürsten begunden sîn harte vâren .
0,17196 daz was der vürsten rât .
0,17197 daz der küninc Kuonrât .
0,17198 gap . dem herzogen Heinrîche einen
0,17199 hov ungenædicliche .
0,17200 ze Regensburc antwurte er ime schône .
0,17201 daz sper joch die krône .
0,17202 durch des rîches êre .
0,17203 er gesach in ouch niemer mêre .
0,17204 der küninc hiez im dô verteilen .
0,17205 daz lant ze Beiern .
0,17206 Liutbalt rihte dô daz lant .
0,17207 daz wart im übele gewant .
0,17208 want er êr sîn hêrre was .
0,17209 des erbe und des lant er dô besaz .
0,17210 der herzoge Heinrîch vuor ze Swâben .
0,17211 dô tet im michel ungenâde .
0,17212 der küninc Kuonrât .
0,17213 der herzoge ze Sahsen vertriben wart .
0,17214 von der werlte verschieet dâ der hêrre .
0,17215 got vone himele genâde der sêle .
0,17216 Welf dô wider dem rîche sich vermaz .
0,17217 der herzoge Liutbalt Faleie besaz .
0,17218 Welf dâ mit im vaht .
0,17219 Liutbalt wart dâ schadehaft .
0,17220 sîne man wurden im erslagen .
0,17221 vile kûme er selbe dannen entran .
0,17222 Liutbalt was ein helt guot .
0,17223 vile schiere er sich dar wider huop .
0,17224 dâ gewan er grôzen schaden .
0,17225 er ne mahte der helfe nicht haben .
0,17226 die im dâ triuwe gehiezen .
0,17227 wie gar si in verliezen .
0,17228 dô muose er anderstunt entrinnen .
0,17229 er en mahte nehein êre dâ gewinnen .
0,17230 dô geuogte sich alsô .
0,17231 der küninc zurnte dô .
0,17232 mit dem edelem vürsten Welf .
0,17233 dô ne wolten im nicht helfen
0,17234 neweder vriunde noch mâgen .
0,17235 si huoben sich alsô trâge .
0,17236 want Welf wider dem rîche was .
0,17237 der küninc Kuonrât Wînesberc besaz .
0,17238 Welf samenente sîne helede .
0,17239 er wolte die burc ledigen .

0,17240 mit dem künige er dô vaht .
0,17241 Welf hête mêrer kraft .
0,17242 vile lützel in daz half .
0,17243 daz rîche dâ vürtraf .
0,17244 Welf vile kûme entran .
0,17245 im wurden gefangen sîne man .
0,17246 Wînesberc man dô ergap .
0,17247 Welf was vehtenes sat .
0,17248 under diu verhangte mîn trehtîn .
0,17249 ein heiden hiez Sangwîn .
0,17250 der sleich hin ze Rôas .
0,17251 alsô iz von den kristen gerâten was .
0,17252 an einen wîhnahtage .
0,17253 alsô ich iu nû sage .
0,17254 der bischolv di êrsten messe sanc .
0,17255 ze den türen wart ein michel gedranc .
0,17256 di heiden dare vüre drungen .
0,17257 di kristene den schaden gewunnen .
0,17258 si sluogen den bischolv ze wâre
0,17259 daz houbet viel im ûf daz corporâl .
0,17260 dâ wart der waltende got
0,17261 anderstunt gemarteret
0,17262 der kristene marter wart grôz
0,17263 daz bluot ze den türen ûz vlôz
0,17264 dâ genas lützel dechein wîp oder man .
0,17265 wir ne kunnen iu niht rehte gesagen .
0,17266 wie vile der kristene erslagen wart .
0,17267 den tiuvel gerouw sît der rât .
0,17268 want er lützel dâr an gewan .
0,17269 mîn trehtîn die sêle zuo sich genam .
0,17270 der bâbes Eugenius
0,17271 der gewarp dô alsus .
0,17272 er hiez iz klagen drâte .
0,17273 dem künige Kuonrât .
0,17274 und dem künige Ludewîge
0,17275 daz en stuont niht lange wîle .
0,17276 unze der abbet Bernhart .
0,17277 den vürsten geliebte die vart .
0,17278 er kom ze dem künige Kuonrât .
0,17279 er manete in harte .
0,17280 mit sîner süezen lêre .
0,17281 er sprach daz selbe unser hêre .
0,17282 in dâr zuo erwelte .
0,17283 der küninc niht langer ne twelte .